


續古文苑

五



贵州省图书馆  
中文旧书



17.8

苑文古續 1.170

(五)

輯衍星孫

叢書集成初編

(補印本)

續 古 文 苑  
五 冊

一九四〇年六月初版  
一九五九年十月補印

孫 星 衍 輯

商務印書館出版

上海虹口印刷廠印刷

續古文苑卷第十八

賜進士及第授通奉大夫山東通省督糧道加三級孫星衍撰

碑志四

大唐朝散大夫行潤州句容縣令岑君德政碑

唐張景毓

蓋聞諸易曰有天地然後有萬物有萬物然後有君臣有君臣然後有上下然則星辰爲緯上陵山險所以經啓八紘彌綸萬域者也聲明文物禮樂詩書所以黼藻生靈化成邦國者也至於高居萬乘富有四海爲而不宰裁成於孕育之先感而遂通囊括於混元之首雖柔來剛往乾坤之軌躅可尋而步帝馳王

雲火之深塵不昧。則疇咨四岳。允釐百工。大則鶴鼎  
魚璜。錫寵於機衡之地。小則緇幡墨綬。守位於子男  
之國。其有相門綉緒。王佐推才。負揭仁義。周旋禮節。  
排九流而迴出。掩三異而孤昇。緝諧吐吏。綏和風俗。  
堂上堂下。驅密賤於後塵。星出星入。置馬期於散地。  
閒而以肅。嚴而不殘。馳心於廊廟之前。■迹于江湖  
之上者。獨在于岑君乎。君名植。字德茂。南陽棘陽人。  
也。其先出自顓頊氏。后稷之後。周文王母弟輝。剋定  
殷墟。封爲岑子。今梁國岑亭。即其地也。因以爲姓。代  
居南陽之棘陽。十三代孫善方。隨梁宣帝西上。因官  
投迹。寓居於荊州焉。自軒階垂祉。姜汭開宗。神岳構

其崕巘靈根肇其枝葉其在佐帝師王封侯尚主十  
卿五公之貴七珥三組之榮衣冠燭耀於區寓允緒  
綿聯於載籍亦由秦移趙壁魏得隋珠不常厥地所  
在稱寶何止梁亭漢室先開佐命之封吳郡荆門晚  
葺因居之地若斯而已哉高祖善方梁驃騎大將軍  
周起部尚書開府儀同三司長寧縣開國公食邑一  
千二百戶贈侍中謚曰敬當萬機之損益成八座之  
儀表銀艾圭茅金鏘玉振榮高當代龍豹之託逾深  
寵茂幽局鵷鸞之寄斯重曾祖之爲隋虞部員外侍  
郎襲爵長寧公霞騫電邁鳳彩龍光初膺星鳥之榮  
晚襲山河之寵祖文本皇朝中書令兼太子賓客宏

文館學士江陵縣開國伯食邑四百戶。贈侍中。謚曰  
惠。宏材巨量。經文緯武。高標百尋。絕壁千仞。丹青神  
化。翊亮天工。即隆周之申甫。亦皇軒之風力。若乃百  
揆務殷。三階事切。西朝機要之所。北閣神仙之地。任  
摠訃謨。榮高密勿。至於五車萬卷。百家諸子。吐鳳懷  
蛟。凌雲槩日。不尚浮綺。尤存典裁。藻翰之美。今古絕  
倫。父景倩。周大中大夫。行麟臺著作郎兼宏文館學  
士。縮青襟而司禮館。草元經而登書閣。聲榮之重。驛  
美於當朝。燕翼之寄。傳徽於後烈。君紫泉飛液。丹山  
耀彩。孤峯懸日月之輝。激溜聚烟雲之氣。虛心倜儻。  
靈鶴再舉而未窮。逸調從橫。大鵬六月而方息。生而

好學。幼而知禮。孝行無待於傍授。仁心得之於自然。黃憲之類。顏回。汝南爲貴。賀循之擬。龔勝。江東擅名。不學左思。十年爲賦。聊同方朔。三冬讀書。不出戶庭。旣馳心於萬里。將排雲日。亦因基於一匱。弱冠以簪纓貴胄。調補修文生。明經擢第。緇帷連夕。拜之所紫禁。迹朝聞之地。圖書所會。館宇生光。解褐同州。叅軍事。譽警北曹。聲馳南府。地靈天秩。渾金璞玉之材。主吏叅卿。孫楚。蕭何之德。屬軒墜卜。遠禹山斯會。撫遺劔而空存。想遊冠而無及。松蘿漢隧。竹染湘川。雖鏤鼎銘彝。將勒生金之字。而庇徒葺事。終資倚玉之材。課効居多。恩腴俯逮。特授蒲州司戶叅軍事。俄以親



累左授夔州雲安縣丞賈誼長沙屈原湘水溪連五  
毒攀鳥路而銜悽峽帶三巴聽猿聲而下淚秩滿丁  
府君憂去職三年泣血七日絕漿殆不勝喪幾於滅  
性服闋調補衢州司倉叅軍事秦稽負日楚夢含雲  
東連射的之山西拒沈珠之浦上農攸屬倉廩爲禮  
節之先下位斯安等列處儕流之首尋沐恩旨雪其  
親累一遇雲雷之施再生花萼之榮旣席寵而沿恩  
亦流根而泊葉君之兄義材望冠時聲名動俗膺奮  
飛而首出指寥廓而曾騫位纔陟於聞鶯才實兼於  
緣鵠旣而八龍雙驥慈明與劉岱均飛二陸三張仕  
衡與孟陽齊價豈直家風祖德見稱於中旨掌紉司

綸復傳於後葉。光輝所燭，朝野增榮。然則宅火均司，象雷分邑。莊周著小鮮之誠，尹何招美錦之嫌。列五等於姬封，高十城於漢秩。字育之道，循良是資。擢授潤州句容縣令。瑤山奧壤，金陵舊地。郊原枕端，委之墟。江漢擁朝宗之水，海潮驚而翔鷺起。山氣合而盤龍見，物產殷積。水陸兼并，人多挺劍之雄。俗有亡珠之弊，君達於時事，明於政理。教不嚴而自肅，化不令而人從。吐黎感惠，愛之如父母。奸邪屏迹，畏之若神明。戶口滋豐，田疇墾闢。行太丘之道德，息灌壇之風雨。國家下武膺運，中興纂業。氛祲廓除，日月開朗。君遇見知之主，逢時來之運。若魚縱壑，如鴻順風。優制

所尊崇班益峻加朝散大夫上柱國紫泥流渥朱紱  
昇榮列五采之通班連九章之賁飾於是貴而思降  
盈而知損如絲之旨載流亂繩之化愈息先是邑居  
湫阨里閭榛蕪爰自歷政未遑加緝君乘三餘之隙  
因四人之暇覽山川之體勢量資物之豐省逐便興  
功因時改作人無廢業役不浹辰流一切之權道成  
累代之宏業頃緣稼穡頗■炎亢雲漢之詠徒勤京  
坻之望斯絕君親加暴露徧請山川率吐庶以具馨  
香俯壇場而展誠敬濃雲布族膏雨成絲絲八極而  
俱灑通四溟而廣徧自非仁心所及誠感必通其孰  
能預於此乎加以道尚朋執情敦讌喜每至星搖劍

室月下珠潭。菱津迴棹。女之喧。桃逕詠樵童之樂。臨  
萬家之井邑。眺千里之風煙。良談閒起。清文不輟。信  
可謂兼文兼武。公才公望者焉。聖上深視九重。高居  
萬寓。廼睠時政。分命使司。端冕旒而思天下。布德澤  
而周海內。博訪英髦。探求異術。十道飛駟。萬域承風。  
江東黜陟。使朝散大夫行度支員外郎攝右臺侍御  
史源乾曜。崖岸孤聳。風飈秀出。千仞罕節。百尺無枝。  
地入星臺。列珠軒而應翟。庭分月樹。搖鐵柱而驚烏。  
冰霜凜白。簡之威霞。日聚繡衣之色。遙同李郃。上迴  
星鳥之暉。俯類張綱。先懾權豪之氣。以君才地。加之  
聲實。每肆揄揚。先膺荐舉。王生千里。佇入於匡。佐荀

氏十旬行登於台府顧眄之重郡縣增榮馳表疏於  
龍閣遽翻飛於鶯路隨郅詵而齊舉攀鄧攸而不留  
黯黯津亭搖搖軒騎壽春遺犢將折轅而共分葉縣  
歸鳧逐行舟而俱遠由是三吳士庶二江人物來暮  
之歌方遠去思之戀益深期竅君於一年思段侯之  
再撫丞魏烜家承軒冕代傳儒墨鳴謙自牧處劇若  
閑以涵牛之巨量貳割鷄之小道主簿崔子佺相門  
卿族玉葉金柯光彩可以射人風神可以凜俗尉李  
芬張隱朝章佩嘉勗等並公侯復祉琳琅積譽經史  
足用刀筆推工暫迴東道之姿多屈南昌之化鄉望  
等或者年宿望或盛族名家負雲澤之懷寶馳水鄉

之俊逸山川舊迹龍蟠武踞之閒軒冕餘風東箭南  
珍之亞並殮和浴道多從食椹之恩老安少懷久沐  
惟桑之化雖功成帝力上皇之耕鑿已勤而事稟圖  
經下邑之風猷可紀是用傍遵縑簡俯緝謳謠覈南  
襄之故事採西郭之前躅飛丹脣瓦行杼雕金之思  
相質披文無媿沈碑之浦其詞曰

山岳■氣河汾孕爲基構百尋源流千丈地靈塊軋  
天姿肸鬩長寧建侯襟懷洞朗江陵奕載風颯峻上  
蹟隱鉤深知來藏往斲雕爲朴用晦而明文緯天地  
武定縱橫如周稷禹似漢良平金社開封珠盤載盟  
逃矣遐緒猗歟克生

案碑詞每段六韻唯此明橫平  
盟生僅五韻必脫去二句也未

見拓本姑識乘彼靈慶光斯燕翼道映時宗言爲士  
此以俟再補雲峯迴植藝蘊縑緗材經邦國金玉其  
則月鏡虛湛鶴鳴不已鴻飛未息欲麗九成先階一  
行筠篁其德聯芳旌旆軒瑩卜遠禹山云萃倚玉推  
匱比迹庠序秦關漢輔吳田豨地孫楚叅卿蕭何主  
才雕金纂懿明鏡不疲詞端筆杪月落雲披時更出  
吏鴻鐘待扣曾叅盡孝賈誼傷離五湖東指三峽西  
處道或推移百里均知帝道光亨聖人有作如鵬得  
窺六修齊稟越自奮飛載翔廖廓珠江控海金陵負  
吹似魚縱壑農皇甄度星躔牛斗雲連蜃閣令長何  
郭夏禹經營雕鏤馬期政實無擾人稱不  
擇循良在茲

欺韋弦是緝冰玉攸資神憂河甸獸斷江湄蝗去無  
限鸞歸有時八使出關二星向蜀乘驄衣繡揚清激  
濁黜陟攸先推埋是屬上敷帝念下從人欲一聽謳  
謠載欣風俗行收顧眄坐成珠玉若管知鮑如蕭待  
王君子既見爲龍爲光選衆而舉載掄載揚飛■日  
路驛薦雲莊眇眇雲澤颯颯水鄉西北萬里東南一  
方坐結去思長嗟來暮躑躅翬壤怊遙鷺路何以報  
恩宸階遠訴何以旌德高碑迴樹潘岳創詞楊修辨  
句一刊懿迹千齡垂裕  
景龍二年歲在戊申二  
月十五日建朝散大夫行雍州錄事參軍張景毓字  
燭微撰業行寺主釋翹微書



唐故朝議郎行兗州都督府方與縣令獨孤府

君之碑銘

唐劉待價

聞夫軋蓋上闢星緯分其纏舍坤輿下蟠河岳裂其封域是以觀象體物建百里之庶邦敦俗牧人置千石之多士則有威霽風雨稱明鏡於當時德洽絃歌号元龜於後葉其有繼美宣化教肅刑清作根本於巖廓爲喉命於黔庶休明一代映徹九泉歷選徽塵歸獨孤府君矣公諱仁政字仁政河南洛陽人也本姓劉氏導擾龍之巨源長河不竭䟽斷蛇之曾岫連岳無窮屬逐鹿於中原乃避時於北漠因山易姓以氣雄邊及魏室之鬱興服袞論道遷周邦而扈從衣

錦還鄉吐奕葉而增昌朝盈紫綬聳本枝而逾懋郡  
接朱轡菌藹紛綸可畧而述高祖永業齊中書舍人  
南道行臺右丞洛州刺史遷左丞加散騎常侍儀同  
三司特進行臺左僕射封夏州啓寧縣開國公武安  
郡開國公廣州德廣郡開國公西平郡開國公瀛州  
章武郡開國公彭城郡開國公各食邑二千戶賜鼓  
吹一部絹布各二千疋錢卅万俘口三百餘人馬五  
十疋轉七兵尚書兼吏部尚書入周拜司徒公行臺  
尚書令冊臨川王大司寇少右弼謚曰貞佩金章於  
黃閣縮盤綬於玳筵內助理於萬機外佐平於百揆  
竒籌獨運戶邑光於六封雅樂相喧鼓吹標於四錫

曾祖子佳。周柱國直閤將軍武安郡開國公華州刺史儀同三司。隨大將軍涇州刺史應國公。拜壇虎將。祠黃石以傳書。刺郡神君。褰赤帷而察俗。賞茅土於輿壤。以荅元功。進儀服於太階。還尊懋德。祖義恭。隨京兆郡富平縣令。唐秦王府倉曹叅軍事。荆王府長史。右衛郎將。左衛中郎將。左監門率。溫汾歸婺四州諸軍事。婺州刺史。上柱國高平縣開國侯。雍容朱邸。陪文雅之良遊。巡警紫微。膺爪牙之重任。百城宣化。得賈父之能名。五等開封。獲通侯之美稱。父士贇。唐宏文生。文德皇后挽郎。虞庠之胄。必擇士林。楚挽之郎。寔資門蔭。選授霍王府戶曹叅軍事。密王府兵曹。

叅軍事原州都督府戶曹叅軍事轉汴州尉氏縣令  
遷坊州鄜城縣令上騎都尉行丹州司馬龍襄爵高平  
縣開國侯幕府端簪聞爲善之最樂列曹從務佐激  
濁以增清叔孝擒奸智窮於耳粟伯騫薦士語重於  
笥金孫氏襲侯尚食漢閒之地謝庭蘊玉還光席上  
之珍惟公騰秀二儀降精五緯髻年對日綺歲叅元  
成千里之權竒望雲驤首刷五色之毛羽抱義賓王  
起家皇朝左勳衛左金吾引駕出警入蹕統式道之  
朱麾夜傲朝巡司禦戎之金革解褐思州司倉叅軍  
事像水之平法絃之直遊刃盈庭之訟發蒙列局之  
疑掌十二之人天致菽粟之流衍改授宣州溧陽縣

丞南服水鄉。北斗星分。吳越雜錯。士吏剽輕。公贊銅  
章以化人。持水鏡而照物。季俗爲之懲革。淳風由是  
興行。轉朝議郎。上護軍。行兗州都督府。方與縣令。法  
三異之化。振百里之雷。敦禮義以教人。薄聚斂以富  
俗。女脩織衽。不下三齊。男務耕耘。還登九穀。推埋止  
息。桴鼓於是稀鳴。囹圄空虛。簡牘以之無事。旣而焦  
延罷職。上書願留。劉寵去官。攀轅而送。方同胡紹。專  
城之任。克遷遽等。宣尼倚戶之吟。斯作以景。龍二年  
三月廿九日。遘疾卒於河內郡之私第。春秋七十有  
七。士喪衣冠。道亡儒墨。德音何在。恨九言之不追。魂  
氣何之。痛百身之無贖。惟公抱素懷璞。蹈孝履忠。蘊

智成囊。含明作鏡。敞三白之虛室。汎登仙之桂舟。酌其流而惑淺深。庇其宇而忘寒暑。儒林罩月。武庫驚雷。六義分落錦之篇。八體下崩雲之陣。阮公琴酒。情盤脩竹之閒。尸子登臨。神王長松之下。清門赴弔。無雜号之賓。儉室奉終。靡一金之產。可謂至德君子。人之楨幹者也。以景雲二年歲次辛亥二月景子朔廿七日壬寅。遷窆于洛州河陽西北韓城鄉龍臺里之平原。禮也。馬啓滕城。鳥飛楊墓。晚風含怨。託松柏以揚聲。斜日緘愁。向煙雲而沮色。嗣子宗業。隆堂構孝。極天經。攀翠柏以長悲。奉元醪而永慕。想元成之祖德。遂述家風。鑒陳寔之貞碑。爰題翠琤。庶陵移谷。變

竹帛非堅而懿德嘉聲乾坤等固其詞曰

擾瀧疏派斷蛇分族遇亂中原避時北服因山易姓  
待時干祿其北魏稱帝佐命爲臣爰從鳳蹕式返雞  
津祚茅食采華轂朱輪其踵德誕美韶姿令器渾金  
璞玉霜鶴雲驥論起談天詞成擲地其振翼鳳穴統  
武兵攔捧戟侍帝綰綬除官霜凝吏道花飛筆端其  
一同蒞俗五美興化剽劫懲奸嗤眩息詐女脩纂續  
男務耕稼其攝官稱謝攀轅告歸佇遷喬木奄落斜  
暉昊天不憖與吾何違其相彼青烏啓茲元室編駟  
發軔丹旒颺日九原不返千秋永畢其贈人悲而結  
惰弔鶴思而氤氳薤灑泣珠之露松纏慘玉之雲爰

勒銘於(元)石以作固於清氛其

劉待價撰

吏部常選(宏)農劉珉書碑出孟縣前未見

大周故鎮軍大將軍行左鷹揚衛大將軍兼賀

蘭州都督上柱國涼國公契苾府君之碑銘

并序

唐婁師德

原夫哲后時乘璧人貞觀必俟風雲之應以光朝列  
尤資棟榦之材式隆王道若乃傑出文武挺生才俊  
道符忠孝性與清白高視於寇賈之前獨步於韓彭  
之上肸響名教蟬聯簪組許史焉可儔金張莫能匹  
四海慕其風範千里仰其談柄玉質金箱探蹟索隱  
沒而不朽其唯賀蘭都督涼園公之謂哉君諱明字



若水本出武威姑臧人也。璧期爰始，賜貫神京。而香  
逐芝蘭，辛隨薑桂。今屬洛州永昌縣，以光盛業焉。原  
夫仙窟延祉，吞霄昭慶。因白鹿而上騰，事光圖諫。遇  
竒蜂而南逝，義隆縑簡。邑怛於是，亡精鮮卑。由其褻  
魄恤允於前涼之境，茂俗於洪源之壑。良史燹焉，此  
可畧而誌也。曾祖哥論，易勿施莫賀可汗。遞襲珪璜，  
夙傳弓冶。共棲梧而比翼，與良玉而齊價。濯如春柳，  
勁逾霜竹。英名振白山，雄圖光紫塞。祖繼莫賀特勤，  
積代爲英傑之先。光圖絢史，保家爲名教之首。按今  
超昔宏材，膠葛洪源。浩汗映竹史，而騰芬綴錦書。而  
擅響父河力，鎮軍大將軍。行左衛大將軍，檢校鴻臚。

卿檢校左羽林大將軍上柱國涼國公。贈輔國大將軍使持節并汾箕嵐四州諸軍事并州大都督。謚曰毅公。塋積膏腴。門標英偉。發言會規矩。動容成楷則。學該流畧。文超賈馬。威青海而安白道。光三部而截九夷。揆務棘司。爲羣寮之宗匠。膺榮蘭錡。成五戎之淮的。而鍾漏斯盡。而贈崇班。聿加千里之榮。俄處六條之位。哀榮之禮。旣洽。朝野式瞻。送終之典。更隆。搢紳翹德。公赤野生姿。青田矯翰。家蓄古賢之操。門傳高士之節。年甫一歲。穉上柱國。封漁陽縣開國公。食邑一千戶。八歲起家。穉太子左千牛。十一穉朝散大夫。太子通事舍人。裏行。十二穉奉輦大夫。若夫紫禁

青規之所必擇賢而方。璠玉階金闕之前。實高門之攸處。所以榮加髻。非澤及綺紈。鳴玉鏘金光。前映後。乃人物之儀表。實衣冠之領袖。重以河山險要。惟賢是居。爪牙任切。非親莫委。麟德牽中。璠左武衛大將軍。賀蘭州都督。自非承家奕葉。累代衣纓。焉可內奉鉤陳。外應刺舉者矣。相府在藩。爲涼州道元帥。以公爲左中軍總督。侍中姜恪爲涼州鎮守大使。以公爲副。然則朝端妙選。實佇異能。望重材高。允膺僉屬。後以鼈海未清。虵川尚阻。戎車所及。尤俟英將。從中書令李敬元征吐蕃。公爲百海道經畧使。於是南討吐蕃。北征突厥。累摧兇醜。勲績居多。後狼山及單于餘

黨復相聚結。奉制討擊。應時平殄。前後賢勞。不可勝紀。改糧左驍衛大將軍。襲爵涼國公。食邑三千戶。賜錦袍寶帶金銀器物雜彩綾錦等數千件。糧長男從三品。以酌功也。仍改爲燕然道鎮守大使。檢校九姓及契苾部落。公倣裝遵遠。望赤水而前驅。勁騎騰空。指白蘭而長驚。左縈右拂。八校於是爭先。斬將搴旗。三軍以之作氣。遂得降絲言。以隆爵命。自而府而錫珍竒。金貝咸紆。繒錦交集。列鼎而光祖祚。分茅以惠子孫。策勲居寂。又糧雞田道大總管。至烏德韃山南。招降二萬餘帳。縱使李牧寧部。魏絳和戎。推昔揆今。當率囚二。尋糧右豹韜衛大將軍。未幾復改糧左豹

韜衛將軍并充懷遠軍經畧大使又依舊知燕然道  
大使公高望重亟膺獎擢得人之譽聞於朝野惟大  
周革命重懸日月擢穉鎮軍大將軍行左鷹揚衛大  
將軍餘並如故有制曰鎮軍大將軍行左鷹揚衛大  
將軍兼賀蘭州都督契苾明妻涼罔夫人李柔順成  
姿幽閑植性聿脩婦德每勤於玉道叶贊夫家必存  
於忠義既竭由衷之請宜覃賜族之恩并及母臨洮  
縣主並蒙賜姓武氏公侯必復河洛胄賢屬寶運之  
開基接僊潢而錫派忠貞無替聲逾金氏表裏承恩  
勲高石窳後穉朔方道總管兼涼甘肅瓜沙五州經  
畧使度玉關而去張掖棄置一生瞰弱水而望沙場

橫行萬里。幄中有策。聞外宣威。豈直操履冰霜。固亦  
心符筠玉。名高一代。氣逸九霄者矣。既而司寇逝川。  
俄結頽山之恨。將軍大樹行。聞斷石之嗟。悲夫。以瑩  
證字案餘已見順瑩元季臘<sup>①</sup>瑩字順陵廿三<sup>②</sup>邁  
陵碑者不更出疾薨於涼州姑臧縣之里第。春秋卅有六。制曰。悼往  
贈榮。經邦之懿典。飾終加等。列代之徽猷。諒以褒德。  
勸能。念勞追舊者也。故鎮軍大將軍行左鷹揚衛大  
將軍兼賀蘭都督上柱國涼國公契苾明。理識開舉。  
局量沉雄。家著勤誠。代彰忠懇。早膺朝寵。夙紹庭規。  
秩峻銜珠。寄隆賜鉞。入叅巡警。恭慎之譽必聞。出綏  
藩落。威惠之聲兼濟。<sup>③</sup>轡不留。夜舟俄徙。未窮遠畧。

奄謝昭途。燹想嘉庸。良深矜歎。宜申殊澤。式旌幽壤。可贈使持節都督涼州諸軍事涼州刺史。餘如故。賜物三百段。便於涼州給付。所緣葬一事以上。並令官供。仍荖涼州都督府長史元仁儼監護。仍令朝散大夫通事舍人內供奉邊懷秀弔祭。既而居諸易遠。宅兆攸資。金甌泛泉。玉雞伺旦。粵以大周萬歲通而元季歲次景申。八<sup>①</sup>庚午朔十五<sup>②</sup>甲申。葬於咸陽縣之先塋。禮也。禮司謚曰公。夙承門閥。早踐通班。茂績昭宣。聲望顯著。學該流畧。藝總兵鈐。以孝安親。以忠奉國。終始如一。存歿不逾。旌善易名。宜憑典實。按謚法寬樂令終。曰靖。請謚曰靖公。惟公降淳粹而蓄瓌

竒稟精忠而挺才望。韶儀淹雅難窺於得失。逸調清通不測其涯涘。抑揚人傑彫績士林。等桃李之無言。若朱藍之在性。先仁而後己。鄙利而尚賢。亭亭有千丈之幹。其高非易仰。汪汪如萬頃之陂。其深不可測。有碩學焉。有令問焉。擅非馬之雄辯。蓄靈蛇之雅作。逸氣上煙霞之表。高明振朝野之際。五公七侯之盛。僅可執鞭。曜蟬鳴玉之榮。纔堪捧轂。如揚彪之承伯。起若班固之嗣叔皮。加以懸榻翹賢。分庭接士。衣裘鞞馬。朝成夕費。兼濟之性。光映人物。乃構厦之良材。映車之名寶者矣。夫人唐膠西公孝義之長女也。齊輝婺彩。擢榦瓊枝。莊敬率由於天然。抑揚女史。溫柔



稟之於本性。光輝內則。旣而雄劍潛鋒。崩城起恨。毀瘠逾於大禮。攀號洎乎剪髮。夷夏足其悲哀。搢紳增其慘感。屈己而遵女誡。飭躬而宣婦道。可謂承家稟訓。執仁組行者歟。長子左豹韜衛大將軍兼賀蘭州都督。上柱國涼國公。密次子右武威衛郎將。上柱國姑臧縣開國子。嵩右玉鈐衛郎將。上柱國。番禾縣開國子。崇等並早涉義方。夙延庭訓。孝心冥弊。至德純深。及候氣纏憂。先嘗空術。充窮盈感。孺慕增悲。棘兒由乎絕漿。柴毀幾於滅性。可謂至德冠幽明。窮迷傷骨髓。哀號擗踊。獨超前輩。雖罔極之誠。踐霜露而逾感。相質之重。映今古而垂裕。是用傍求翠琬。式樹豐

碑家風祖德居然在斯用以光士行用以芳本枝歷  
千秋兮無斁經百代兮無虧銘曰

東井蒼蒼西土茫茫而開分野塋列封疆門多英毅  
代產忠良偉哉人物紛乎典章其前涼後涼乃祖乃  
父赫奕冠蓋蟬聯文武金箱玉質光台映輔至德符  
孝貞心翼主其可汗嗣出抑揚流輩業盛后昆道隆  
前燹遐迩欽挹夷夏欣戴四海英髦共推貞槩其特  
勤垂裕搏風振翼孔席申歡嵇松比直智水游泳仁  
山止息討本尋源斯標岐嶷麒毅公雅節莫之與京  
既忠且孝王佐人英研精流畧捐■良平昭昭餘慶  
恤允膺榮其挺生異材齟牽振響未盈小學亟承恩

將門閱易隆。墻仞難仰學。行無數。名實逾廣。其露冕  
關河式清邊。傲遽宣威德。聿敷名教。肅彼夷落。鎮茲  
襟要。人揚德宇。窮微盡妙。其綏邊寄重。尤資望族。顯  
允竒材。悠然嗣福。外清荒憬。內膺榮祿。總戎之寄。聲  
連祕牘。其詵詵于隰。屢警邊城。侵②躍馬槩④揚旌。  
橫雲列陣。背水開營。未經干②。俄夢兩楹。其光鷲繡  
留居諸。易促旋悲。委珮遽傷。埋玉松蔭。隴兮均青。草  
榮墳兮吐綠。式鑄貞琬。以光勝躅。其先天元年  
歲次壬子十二月十六日辛亥孤子息特進上柱國  
涼國公嵩立父碑。肅政御史大夫上柱國婁師德  
製文。左肅政御史殷元祚書。今石本損泐據汪太史唐碑錄存載之

大唐處士胡君墓誌并序

君諱佺字尚真定安人也。遠祖曰宦。遂尻介休。夫攘  
椽是佐。錯胡綜之文章。清白知名。見胡威之父子。光  
光懿烈。不替先風。簡謀詳諸。可畧言矣。祖買隋孝廉  
舉文林郎。幼洽詩書。長崇禮樂。太初玉樹。夙擅嘉聲。  
韋氏金籬。遽昇高第。父端養素不仕。情貪野薜。志篋  
裘裳。道王丘琴。跡存山水。君濯濯儀形。汪汪軌度。珠  
胎孕月。光彩絕倫。蘭若銜風。幽芳自遠。鄉里稱善。喻  
彼少游。文籍自娛。同夫孟陋。遺累嚙滓。傲性煙霄。簪  
軒不介於懷。寵辱不驚其慮。歲臨辰巳。鄭康成於是  
云亡。月犯少微。謝慶緒俄而致殞。春秋七十。卒于私

第夫人石氏穠荷比秀美箭齊貞宜其室家和如琴瑟翰林之鳥始雙飛而隻飛龍門之桐俄半生而半死嗣子懷爽懷玉岵岵長違霜露增感粵以開元三年歲次乙卯龍集單闕十月己酉朔廿五日癸酉遷窆於介休縣東廿里平原禮也絲上山傍昭餘澤右懼陵谷而驟易思封樹而永懷乃爲銘曰

盤根安定散葉汾壩乃祖乃父光後光前惟君節槩業尚虛元鬼瞰庭宇鳥鳴座筵不逢石髓俄歸玉泉一闕上隴長嗟逝川

唐故葉有道先生神道碑并序唐李邕

昔者誕發老君道純天地生得夫子身負日月且時

宰不宗。主人勿用。矧乎埋照後谷。潛盤窮山。幽姿蛻  
於塵容。素尚允於仙類。豈辟命行矣。爵服繫之而已  
哉。公諱國重。字雅鎮。南陽葉縣人也。自少典錫羨高  
辛纂緒。陶唐重熙。后稷邁種。文王之允。乃食於沈。尹  
戍之子。載封於葉。受氏享國。大哉邈乎。逮乎祖乾。昱  
克壯其猶。永孚於德。瑾戶習隱。塞允億坤。碩膚長材。  
通理博藝。雖安車累至。而堅卧固辭。故慶祚克開。眉  
壽維永矣。厥考道興。性守宮庭。道敷邦國。居鬼從地。  
率神從天。受錄以怛之。飛符以北之。垢魍魎之邪。劉  
臺台之崇。有足竒也。至於揮札落紙。引弓貫革。特起  
五部。廣推大餘。侯誰嗣哉。先生靈承道宗。異聞訓誘。

弱喪文貌。幼尚純篤。仙骨有象。童心不萌。專精五龍。遍遊羣岳。聰以達遠。明以察微。達死生之占。體物氣之變。嘗靜貞動耗。息影歸止。雲外壑。林巢仙居。人絕不鄰。道阻且右。獨往幽勝。永歌隱淪。放聞保和。習虛致靜。掬五石之髓。擷三芝之英。時哉不留。歲聿其逝。緇髮純漆。韶顏渥丹。事適元同。神與道媾。惟寂惟冥。不飲不食。數十載於茲。乃昇聞帝庭。駿發皇眷。蘭才受命。降尊加禮。將之以文馬。速之以暢轂。先生盱眙長揖。握手高謝。曰自昔帝舜登庸。德輝允鑠。光武繼統。吏道孔嘉。且薛方逢萌。備外臣之禮。虞仲夷逸。終處子之業。豈垢俗疵物。偏貢介性。將探道慕類。坐

致竒齡。使者蓄而之疑。申遂行之旨。乃周覽廬室。躬  
省倉廩。考疇人之疆晦。訊家童之作業。皆儉以遵約。  
安能維始。味不甘口。色無養目。信以爲著誠去僞。敢  
守難奪。順風可即。強起曷至焉。遂虛覲復命。慙歎聞  
列。朝廷企其高。渴其道。聆嘉聲而屬■者。豈勝言哉。  
有司以天元書缺。星度官弛。亡五德之運。謬四時之  
分。荆鬼越祥。不知所況。子亥母癸。烏識其原。皆乘遽  
遠尋。請益傳受。可謂繩誠列而曲直徵。衡誠懸而輕  
重立。粵惟博物君子。豈伊小說。鮪生嗚呼。天不持久。  
人將復歸。積年迫於期頤。遠志屈於摧落。卜兆幽石。  
託墳清林。逸人不追。國士靡憲。泉石沮色。鄉縣失聲。



豈無他人。惟子之故。允子慧明。贈銀青光祿大夫。歛  
州刺史。公因替厥繇。代增其業。啓祕錄之高妙。揚元  
津之洪波。道微若聲。心麼若氣。吹律煖谷。運歷知天。  
屢下辟書。終不應命。孫子景龍。觀道士鴻臚。卿越國  
公。幼得父書。早傳成法。夤念有訓。邁迹自身。讀天下  
之書。備方外之術。火滌淫祀。劔誅羣妖。恩開五君。名  
動四國。其入也。排金鎖。謁紫庭。爲帝傲吏。出也。法玉  
京。坐元寺。作仁宗師。故能大匠道門。冢卿朝右。禮食  
軒座。寓直禁廬矣。嘗以理氣自強。登老益壯。雖暮景  
急節。而純孝孔哀。是獻封章。願拜墳墓。有軼帝念。載  
形王言。神札以飛。傳瑞乃發。羣公帳錢。列蕃郊迎。朝

輝有章。鄉人皆慶。枉以末技。揚於孝心。惟先志以追  
遠。立豐碑以紀德。夫何閒然。其詞曰。

宗門素履。家代隱仙。道一相孕。薪火交傳。黃公術左。  
赤水珠聯。道開幽鍵。性與真筌。一門累祖。四世百年。  
抗迹巖谷。消聲天地。卓尔遐舉。藹然高致。麝以臭焚。  
珠以明墜。人則有心。徵亦不至。保身匪媮。全樸爲利。  
孝孫增業。明辟順風。志嘗無忝。事或不同。徵賢朝滿。  
舉逸山空。曷由高枕。克謝代工。測微達變。盡規納忠。  
皇眷雖渥。孝思亦深。章服粲粲。傳駟駸駸。載違廷闕。  
是展墳林。紀石追遠。昭銘率心。孝終事立。榮歿寵今。  
遐超古始。永憲江南。

開元五年歲在丁巳三月

七日括州刺史李邕文并書處州志載此文為法善使李邕夢中書之故名

追魂碑錄  
以志異聞

大唐贈歙州刺史葉公神道碑 唐李邕

公諱慧明字德昭南陽郡人也其先系自軒后殄于周文聃季食沈子高封葉因為氏矣逮問政孔好龍得真代有聞也昔者惟帝興運乃聖炳靈風雲相從卜夢通感閒氣駿發良弼大來有開必先憑物為為因自然矣則我使君降僊府乘道流追縱隱淪叶契幽叟結廬澗沚考盤巖椒同人利貞遁代勿用雅好酒德尤邃老經話言解頤精絕倒誘進不倦虛納盡好事集門長者闐里每至升月帷戶咏風林

薄植杖嘯谷。席皮琴山。泰然樂生。澹乎忘老。方其維  
性。壽。遡神僊。旬赤松之遊。縱黃■之術。外身先物。歸  
根致柔。緣以大均。持以大定。色理不盪。寵辱不驚。繩  
繩焉。熙熙焉。孔德之容。罔可測已。故師長旌禮。邦族  
與化。智者謂智。仁者謂仁。雖褐塞桑。樞紵衣韋帶。必  
避途加敬。襄風惕息焉。是用克聞於家。大育厥允。則  
我越公。襲上德。延慶靈。生而知之。學而習之。有專門  
之資。得不承之業。纔齟犴道。既冠同元。訊遠岳之福  
庭。覲幽尋之方士。陳呪雷駭。吐刃電光。沈海莫濡。蹈  
冶匪藝。呵萬鬼。搦百神。啓陰官之符。變冥司之籙。追  
究往事。坐知來茲。膏肓無所遁其形。霧露不能滋其

疾竒跡多緒。嘉聲日聞。是以大君孔休。辟命荐至。入  
自卧内。問以咎徵。造膝必誠。遇事偕中。時更四紀。代  
且五王。順風以請。天師敷衽。以近皇極。緇素莫能出  
右。公卿是惟虛左。國家有事。天地將旅。海岳公嘗致  
禮。加璧能事。潔羞傳駟。載途郡邑。迎謁者。歲四三焉。  
自頃賊■嗇。袖小人吹蠱。敢爲戎首。興此厲階。天步  
未亨。人事將殆。公乃極陳幽贊。大啟聖猷。枚卜撰辰。  
並走羣望。作爲邦翰。■主憂殄勦。元兇翼扶。皇統  
是嘉。厥異式揚。爾忠爵賞。懋於身寵。贈光乎考。匪此  
父也。曷訓其子。匪此子也。曷揚其親。松楸已行。碑板  
未立。永念終古。追存孝思。驟請闕廷。第如江介。遠訪

才子。枉逮鄙夫。趙括論兵。多缺舊學。班固述史。寔賴家書。顧惟成章。實愧貞石。其詞曰。

眞隱夷軌。默僊解形。倬哉獨立。企古遐征。殆庶元德。升觀丹經。服鄉不涅。光咏無營。築卜岑渚。上藥待琴。徐嘯風谷。緩步月林。白雲怡意。清泉洗心。曷勝不往。曷竒不臨。迹因神遠。情隨地深。舉代方籍。皇家未軾。肇■懿子。載揚令德。左慈致物。越人辨色。司察鬼謀。役使神力。寵被五君。聲聞八極。日嘗薄蝕。國有多難。兇慝扇揚。忠烈憤惋。亦旣先覺。克啻幽贊。皇哉神武。赫然天斷。薄言即戎。于以戡亂。帝念疇庸。典開列土。豈曜厥身。寔贈于父。朱藩乃錫。紫綬是與。存致歿榮。

忠伸孝舉烈烈桐柏緒風興悲表墓有關紀德無詞  
哀哀嚴蔭藥藥孝思孰傳終古是建豐碑 贈慧明

銀青光祿大夫歙州刺史子道士灑善授鴻臚卿封  
越國公 開元五年太歲丁巳鶉尾七月夷剽七

日甲辰建江夏李

國子監太學生

故銀青光祿大夫祕書監兼昭文館學士侍讀上柱

國常山縣開國公贈潤州刺史馬公墓誌銘并

公諱懷素字貞規本原扶風其先自伯翳馬服具諸  
史載暨漢南郡太守融命代大儒公即其後也十一  
代祖機抗直不撓晉御史中丞扈元帝渡江家南徐  
州丹徒故今爲郡人也代以學聞高祖消博綜墳典

仕陳爲奉朝請。曾祖法雄，慷慨倜儻，好孫吳，不事筆研。陳橫楚將軍，祖果，願，願學禮經，不隕素業。即學士，樞之從父兄也。少爲尚書，毛喜所知。陳本州文學，從事。父文超，果行，毓德，精意易道，及洪範，頗曉氣候。貞觀中，以有事遼，沮，策名勲府。龍朔初，黜陟使舉檢校江州尋陽丞，棄官從好，遂寓居廣陵，與學士孟文意，魏令謨，專爲討論，具有撰著。公即尋陽府君第三子也。幼聰穎，六歲能誦書，一見不忘，氣韻和雅，鄉黨以爲必興此宗。十五徧誦詩禮騷雅，能屬文，有史力。長史魚承暭特見器異，舉孝廉，引同載入洛。尚書倉部郎河東裴琰之，博學深識，見名知人，音旨儀形，海



內籍甚。公年甫弱冠，便蒙引汲，令與子之研覃，遂博遊史籍，無不畢綜。以文學優贍，對策乙科，乃尉郿，無何，丁太夫人。■■憂，即陳學士宏直曾孫女也。本自名家，貞高博識，公在艱，疚骨立，柴毀殆不勝喪。服闋，授麟臺正字，少監京兆，韋方直好學愛士，善飛白書。以公既及冠禮，未嘗立字，遂大署飛白，云懷素字貞規，扶風之學士也。封以相遺，其為時賢所重如此。以忠鯁舉，除左鷹揚衛兵曹參軍，轉咸陽尉。昔則天太后，大崇諫職，授左拾遺，深盡規諷，尋改左臺監察御史，歷殿中，彈紕不避強禦，加朝散大夫，轉詹尹丞。朝論稱屈，遷禮部員外郎，與范陽盧懷慎隴西李傑俱

以清白嚴明。分爲十道按察。以公詞學瞻洽。精覈文章。轉授考功員外郎。修文館直學士。遷中書舍人。與李乂同掌黃畫。踰年。檢校吏部侍郎。實允僉屬。朝廷以刑政所急。改授大理少卿。關畿佇材。除朔州刺史。惠實在人。入爲太子少詹事。判刑部侍郎。加銀青光祿大夫。兼判禮部。尋而正除刑部。時稱慎恤。轉戶部侍郎。上以河南蝗旱。令公馳驛賑給。宣布聖澤。所至甘雨使迴。拜光祿卿。遷左散騎常侍。轉祕書監。四部舛雜。頗多殘蠹。公備加校定。廣內充積。加兼昭文館學士。與右散騎常侍褚无量。更日入內侍讀。每至宮門。恩勅令。小舉上殿。自車丞相已來。殆將千載。始

見此禮公疇日自序云慕善嫉惡好學潔己自謂不  
慙古人無負幽明矣直哉是言不騫厥信以開元六  
年三月十日遘疾中旨遣御醫賜藥相望道路以開  
元六年七月廿七日終于河南之毓財里第春爍六  
十皇上輟朝二日舉哀■次乃下制曰存樹高烈君  
子所以立身沒垂令名古人所以貽範銀青光祿大  
夫故祕書監兼昭文館學士侍讀上柱國常山縣開  
國公馬懷素越箭舍貞楚材登用清芬獨映至德可  
師自服勤典籍納訓惟展輔朕以媿道弼予以正言  
允資惠迪實表泉懿而曾不憖留欵焉彫落思甘盤  
之舊學臨宣明以增歎興言感愴用震悼于厥懷可

贈使持節潤州諸軍事潤州刺史贈物三百廿段米粟三百廿碩喪葬所須並令官給京官六品一人檢校公雖累登臺閣率身儉素俸祿之資賙贍親友及啓手歸全家無貲產唯有書數千卷以爲燕翼以其年十月十三日窆於洛陽古城之北原禮也有子巽等雖年在童孺禮過成人棘心纍纍感于隣巷敬勒行事以旌泉戶銘曰

益佐理水功施生人羨于馬服守趙却秦東京威賈南郡儒珍德先惟永弈弈振振其朝請風素橫墊矛戟從事顓禮尋陽洞易公自名家伏膺經籍鼓鐘外遠純涂詳未內積其二用材南楚待問東堂持斧作憲

含香拜郎。再飛禁掖。七踐文昌。國傳茅土。巷擁旗常。  
其井春紛綸。桓榮稽古。行儒師逸。高跡誰伍。公實踵  
之。堂奧斯覩。匪徒外潤。爰歸內補。嗚惟昔殷后。學于  
甘盤。一期千載。遇君則難。充堂何那。其臭如蘭。懿哉  
夫子。斯言不刊。琪仁謂必壽。神期式穀。生寄雖浮。夜  
趨何速。寵極韓賜。恩深衛哭。徒望邢山。豈忘喬木。琪  
崢嶸徂歲。寂歷空岑。白日無影。寒雲半陰。燕城表滅。  
漢水碑沈。貞臣之墓。樵牧誰侵。琪

後漢大司農鄭公之碑

唐史承節

夫囊括宇宙者文字。發明道業者典墳。所以聖人作  
而萬物覩。賢人述而百代通。禮樂得之以昭明。日月

失之而寒忒。宣尼彰刪緝之功。秦始速焚燒之禍。迨乎羣儒在漢。傳注瑤■。莫不珠玉交輝。纖微洞迹。同見集於芸閣。獨有輟於環林。豈若經教奧義。圖緯深術。兼行者多。無如我鄭公也。公諱元。字康成。北海高密人也。八世祖崇。哀帝時爲尚書僕射。公少爲鄉嗇夫。不樂爲吏。遂造太學受業。師事京兆第五元。始通京氏易。公羊春秋。三統。歷。九章算術。又從東郡張欽。祖受周官禮記。左氏春秋。韓詩。古文尚書。攝齋問道。摳衣請益。去山東而入關右。因盧植而見馬融。考論圖緯。乃召見而升樓。精通禮樂。以將東而起歎。三載在門。十年歸邑。及黨事起。遂杜門不出。隱修經業。於

是鍼左氏之膏肓。起穀梁之廢疾。而又操入室之戈。矛發何休之墨守。陳元李育。校論古今。劉瓌范升。憲章文議。何進延於几杖。經宿而逃。袁隗表爲侍中。緣喪不赴。孔融之相北海。屣履造門。陶謙之牧徐州。接以師禮。比南山之園皓。鄉曰鄭公。類東海之于君。門稱通德。漢公車徵爲大司農。給安車一乘。所過長吏送迎。公乃以病自乞還家。董卓遷都。長安公卿舉公爲趙相。道斷不至。會黃巾寇青部。乃避地徐州。建安元年。自徐州還。道遇黃巾賊數萬。見公皆拜。相約不敢入縣境。時大將軍袁紹總兵冀州。遣使邀公。大會賓客。廼延升上坐。身長八尺。飲酒一斛。秀眉明目。儀

容溫偉。客多豪雋。並有才說。見公儒者。未以通人許之。競設異端。百家互起。公依方辨荅。咸出問表。皆得所未聞。莫不嗟服。將汝南應劭。亦歸於紹。因自贊曰。故太山守應仲遠。北面稱弟子。何如。公笑曰。仲尼之門。考以三科。回賜之徒。不稱官闕。劭有慚色。門人相與撰公荅諸弟子問五經。依論語作鄭志八篇。公所注周易尚書毛詩儀禮周官禮記孝經尚書大傳中候乾象歷。又著天文七政論魯禮禘祫義六藝論毛詩譜駁許慎五經異義荅臨孝莊周禮難凡百餘萬言。經傳洽熟。稱爲純儒。其所撰著。今並通習。是知書有萬卷。公覽八千也。齊魯閒宗之。公後嘗疾篤。自慮。



以書戒其子益恩曰。吾家舊貧。爲父母羣弟所容。去  
廝役之吏。游學周秦之都。往來幽并。兗豫之域。大儒  
得意。有所受焉。遂博稽六藝。粗覽傳記。時觀祕書。緯  
術之奧。年過三十。乃歸鄉。假田播殖。以娛翰空。後舉  
方正賢良有道。辟大將軍三司府。公車再徵。比牒併  
名。早爲宰相。惟彼數公。懿德大雅。克堪王臣。故宜式  
敘。吾自忖度。無任於此。但念述先聖之元意。思整百  
家之不齊。亦庶幾以竭吾才。故聞命罔從。而黃巾爲  
害。萍浮南北。復歸鄉邦。入此歲來。已七十矣。宿素衰  
落。仍有失誤。案之禮典。便合傳家。今我告爾以老。歸  
爾以事。將閑居以安性。覃思以終業。自非拜國君之

命問族親之憂。展敬墳墓。觀省野物。胡嘗扶杖出門乎。家事大小。汝一承之。咨爾煢煢一夫。曾無同生相依。勗求君子之道。研鑽勿替。敬慎威儀。以近有德。顯譽成于僚友。德行立於己志。若致聲稱。亦有榮於所生。可不深念耶。可不深念耶。吾雖無紱冕之緒。亦有讓爵之高。自樂以論贊之功。庶不遺後人羞。凡某所憤憤者。徒以吾親墳壠未成。所好羣書。率皆腐弊。不得於禮堂寫定。傳與後人。日西方暮。其可圖乎。家今差多於昔。勤力務時。無恤飢寒。菲飲食。薄衣服。節夫二者。尚可令吾寡恨。若忽忘不識。亦已焉哉。八年春。夢孔子告之曰。起起。今年歲在辰。來年歲在巳。既寤。

以讖合之。知命當終。有頃寢疾。享年七十有四。以其年六月卒。遺令薄葬。自郡守以下。嘗受業者。纒經赴會千餘人。廼葬於高密縣城西北一十五里礪阜山之原。嗚呼哀哉。有子益恩。孔融在北。衆舉爲孝廉。及融爲黃巾所圍。遂赴難。隕身。有遺腹子。公以其手文。侶己。名曰小同。精通六經。鄉人尊之。時爲侍中。嘗詣司馬文王。文王有密疏。未之屏也。如廁還。問曰。卿見吾密疏乎。荅曰。不見。文王曰。寧我負卿。無卿負我。致鳩而卒。悲夫。自夫子沒後。大道方器。公之網羅遺典。探蹟今猶。特立鬱然。時季途屯。志不苟變。全身遠害。猗歟美歟。及范曄作論。有曰。王父豫章君。每考先儒。

經訓長於公。常以爲仲尼之門。不能過也。及傳受生  
徒。專以鄭氏家注云。晉中興戴逵字安道。以鷄卵汁  
澠白瓦屑。爲公作碑。手自書寫。文■■■■語亦妙絕。  
年代古。而碑闕亡。德音夔而詩書在。承節以萬歲通。  
天元年。奉勅於河南道訪察。觀風省俗。激濁揚清。行  
至州界。見高密父老云。鄭先生漢代鴻儒。見無碑記。  
不以庸妄。遂託爲文。往以會府務殷。■■無暇景。歲序  
遷貿。執筆無由。今者罷職含香。忝居分竹。屬以閑隙。  
乃加修撰。耆舊者惟聞其名。後生者不覩其事。今故  
尋源討本。握槩懷鉛。兼疏本傳之文。並序前言之目。  
發九泉之冥昧。播千載之■■■■剪以繁華。不爲雕飾。

文先成訖。石又精磨。碑未建而承節卒。正議大夫使持節密州軍州事刺史上柱國鄭杳。以開元十三年秋八月。巡茲屬縣。敬謁先宗。欽承墳墓之間。籌度碑石之側。公心至清。不欲費。公性至靜。不欲勞。煩廼命參軍劉肫。校理舊文。規模新勒。未閒。肫又罷職。仍令終事。冬。閏十二月。公伺其歲隙。因遣巡團。便令建立。惠而不費。允協人神。承節銘曰。

煥乎人文。圖籍典墳。煩亂事翦。定自孔君。中途湮沒。秦帝俱焚。漢興儒教。鄭氏超羣。膏腴美地。簪紱宏規。嗇夫罷署。京兆尋師。中候乾象。左氏韓詩。雖稱積學。殆若生知。公之挺生。大雅之懿。囊括墳典。精窮奧秘。

六藝殊科。五經通義。小無不盡。大無不備。好學慕道。深思遠慮。來往周秦。經過兗豫。侍中不仕。司農罷署。盧植東遇。馬融西去。作者謂聖。述者謂明。躬違三辟。門傳五更。周官東部。漢隄西京。白玉遍地。黃金滿籩。占卜潛橋。行途過沛。陶謙師友。孔融高蓋。山啓黌扉。草生書帶。七十歸老。三年赴會。經傳洽熟。齊魯攸宗。爵祿不受。贊論爲功。禮樂今去。吾道皆東。類于標德。比皓稱公。閻尹擅貴。禁錮連年。乃逢宥罪。方從舉賢。南城避難。東萊假田。誕膺五百。終覽八千。今年在辰。來年在巳。嗚呼不愁。于嗟到此。勞我以生。息我以死。道該八索。神交千祀。濰水之曲。礪阜之陽。通德爲里。

鄭公爲鄉。雲愁廟古。月暗墳荒。舊碑先沒。新石再彰。  
詞愧黃絹。心淒白楊。明於不朽。終古騰芳。

鄉貢

進士■安中書丹。徵事郎前行密州高密縣主簿。  
兼管勾常平倉事。綦■裔篆額。  
歲次庚申三月一日勒成。

大金永安五年

大唐元氏縣令龐君清德之碑 唐邵混之

我國家再誓山河。重懸日月。明罰飭法。覈名實之故  
典。考績宣力。甄象魏之舊章。皇道煥炳。而時乘帝載。  
緝熙而日用。德惟善政。政在養人。若令長子男。銅章  
墨綬。而尤善最者。可屈指而知。宣父中都。太公灌邑。  
童恢責獸。卓茂遷蝗。男女別途。鬼神息暴。以今方古。

君何讓焉。君姓龐氏，名履，溫字若水，南安人也。其先齊逢，伯陵之裔。曾祖卿，憚元勳佐命功臣，第壹等。左武侯大將軍，封國公，食實封四百戶，贈幽平燕易。馮檀等六州諸軍事，幽州刺史，謚曰肅。歷數雖改，雲雷尚屯，披荆棘者馮吳，佐元功者蕭鄧，將盟帶礪，畫象雲臺，圖兼衛霍。案此借霍字之容，仕遂漢光之願，曙庸賞懋，食邑論封。祖同福，并州大都督府司馬，饒州刺史，左衛將軍，安北都護，外揆望殷，銜珠寄重，匪親不擇，非賢勿居。早蓋南臨，尋振喬卿之譽，紅旌卷式，標鄭吉之能，考承訓通事，舍人鄭州司馬贊善大夫，率更令，將作少監，辭令抑揚，綸鳳述旨，題輿叶詠，展




驥治中。洪洞方樟。允供於邦。造激揚少彙。贊於搖山。君純德天資。大材靈降。龍章龍彩。凝脂點漆。出忠入孝。遊藝依仁。荒蕪四壁。寥廓千丈。代陪豐沛。親預葭莩。翼鱗翰之。風雲之會。漢表有外戚恩澤。周詩有申伯渭陽。起家補昭文生。從勳閎也。長安二年。明經擢第。擢宣州參軍。尋授莫州司功參軍事。秩滿。丁二親憂。痛瘁瑩枝。哀酸鄰社。往而不返。杖而後行。縵禪一年。甫從常調。開元十九年春。會府遂拜公爲此縣令。魯子臯之爲政。禮變鄙人。漢原涉之舉能。威行谷口。庶矣富矣。又何加焉。導之齊之。非君莫可。君有善政者七。風電咸下於屬城。樹稼獨滋於元氏。其

政一也。頃以陽光暫昃，陰液乖旬，苗慮騰興，人或狼顧。公罄奠珪幣，稽顙壇場，俄而油雲四周，膏雨百里。其政二也。闢土菑畬，用丁分地，勸東作而播稼，課西成之銓斂，躬臨樹藝，親載酒醪，故使夏農服田，秋得其實。其政三也。詢知疾苦，所患虛丁，撫狀上陳，應時申削，籍無■稅，人獲息肩。其政四也。修職奉符，不爲進越，下有鬱滯，必掣肘諭言，每課田租，時臨調賦，寬爲■約，曾無再輸。其政五也。此地俗多慳吝，跼躑彈絃，素曰難持。案金石萃編云：當是治避高宗諱，猶治書侍御史作持也。其說是矣。更承寬弛，公整其銜策，謫其權豪，輒去害羣，悛心斂跡，其政六也。先縣館宅，湫漏與百姓雜居，公薄責人傭，先

抽己俸。雖與慮始。而可以樂成。其政七也。是以廉平稱職。西河知魯衛之風。清儉當官。南土變夷齊之俗。可大可久。是謂賢人之德。惟幾惟深。以成天下之務。公儀如繪畫。神若轉規。聲以聞於震雷。用無待於周月。惠如春露。吏人不能窺喜愠之容。結若冬冰。貨殖不能動首陽之行。蓄霜鍾於絳府。有感必通。淒月鏡於元臺。觸形皆照。邑老謝虔祐等。並鄉庭積善。掾吏安排。行義以達其道。隱居以求其志。相與族談城府。錯立康莊。襄德匪舒。宣風技癢。或叫帝閭。而抒美。或邀使駕。而論功。衆志誠如寒附火。於是圖徽翠琰。託懿金聲。其詞曰。

清風汎濫兮其來溥。茂宰馳能兮超卓魯。雞犬相聞兮人安堵。一同仰之兮如父母。聽謳謠兮詢疾苦。踰屬城兮光趙部。趙■遺風兮多慎伎。君子爲之屏姦偽。化澆浮兮勗以義。邑■今市無二。政勝殘兮仍博施。如水火兮時不匱。刻石鐫金兮遠傳懿。直爲循良兮守名器。開元二十四年歲在困敦律中夾鍾八日建前鹿泉縣令邵混之篋。蔡有鄰書。

續古文苑卷第十八



續古文苑卷第十九

賜進士及第授通奉大夫山東通省督糧道加三級孫星衍撰  
碑志五

右拾遺陳公旌德碑。

唐趙儋

大唐劍南東川節度觀察處置等使戶部尚書兼梓  
州刺史兼御史大夫鮮于公爲故右拾遺陳公建旌  
德之碑。

公諱子昂字伯玉梓州射洪縣人也其先居於潁川  
五世祖方慶好道得墨子五行祕書白虎七變隱於  
郡武東山子孫因家焉生高祖湯湯爲郡主簿湯生  
曾祖通通早卒生祖辯爲郡豪傑辯生元敬瑰偉倜

儻弱冠以豪俠聞屬鄉人阻飢一朝散粟萬斛以賑貧者而不求報年二十二鄉貢明經擢第拜文林郎屬青龍末天后居攝遂山棲餌术殆十八年元圖大象無不達嘗學術擬張平子風鑒比郭林宗公即文林元子也英年過人彊學冠世詩可以諷筆可以削人罕雙全我能兼有年二十四文明元年進士射策高第其年高宗崩於洛陽宮靈駕將西歸於乾陵公乃獻書闕下天后覽其書而壯之召見金華殿因言伯王大畧君臣明道拜麟臺正字由是海內詞人靡然向風乃謂司馬相如楊子雲復起於岷峨之間矣秩滿補右衛曹每上䟽言政事詞旨切直因而解罷

稍遷右拾遺。屬契丹以營州叛。建安郡王武攸宜親  
總戎律。特詔左補闕屬之。迨及公叅謀幃幕。軍次漁  
陽。前軍王孝傑等相次陷沒。三軍震懼。公乃進諫。感  
激忠義。料敵決策。請分麾下萬人。以爲前驅。奮不顧  
身。上報於建安。建安復諫。禮謝絕之。但署以軍曹掌  
記而已。公知不合。因登薊北樓。感昔樂生燕昭之事。  
賦詩而流涕。及軍罷。以父年老。表乞歸侍。至數月。文  
林卒。公至性純孝。遂廬墓側。杖而後起。柴毀滅性。天  
下之人。莫不傷歎。年四十有二。葬於射洪。獨坐山。有  
詩十首。入正聲集。十卷著於代。友人黃門侍郎范陽  
盧藏用爲之序。以爲文章道喪。五百年得陳君焉。由



是大中之詞。紙貴天下矣。有子二人。並進士及第。長曰光。官至膳部郎中。商州刺史。仲曰斐。歷河東藍田。長安三尉。卒。官光有二子。其長曰易甫。監察御史。次曰簡甫。殿中侍御史。斐生三子。長曰靈甫。次曰競甫。衆甫皆守緒業。有名於代。劍南東川節度使兼御史大夫梓州刺史鮮于公。自受分闡之征也。初年謀始立法。二年人富知教。三年魯變於道。乃謂幕賓曰。陳文林散粟萬斛。以賑鄉人。得非司城子罕貸而不書乎。拾遺之文。四海之內。家藏一本。得非臧文仲立歿而不朽乎。於戲陳君。道可以濟天下。而命不通於天下。才可以致堯舜。而運不合於堯舜。悲夫。昔孔文舉

爲鄭元署通德門。蔡伯喈爲陳寔立太丘頌。異代思  
賢之意也。況陳君顏閔之行。管樂之材。而守牧之臣。  
久闕旌表。何哉。爰命末學。第敘豐碑。表厥後來。是則  
是效。其頌曰。

有媯之後。封於陳國。根深苗長。世載明德。文林大器。  
質匪雕刻。學術鉤深。風鑒詣極。代公耿光。喬元藻識。  
施不求報。退身自默。岷峨降靈。拾遺挺生。氣總三象。  
秀發五行。才同入室。學匪獵精。明明天后。羣龍効庭。  
矯矯長離。軒飛梁益。封章屢抗。矢陳刑辟。匪君伊順。  
惟鱗是逆。九德未行。三命惟錫。帝命建安。遠征不伏。  
咨公幕畫。騁此驥足。惟王玩兵。愎諫違卜。忠言不納。

前軍欲覆遂登薊樓莫寫我憂大運茫茫天地悠悠

沙麓氣衝大陰光流義士養薇人誰造周嗟乎道不

可諧遂放言於感遇亦阮公之詠懷已而已而陳公之微意在斯表辭右省來歸温

清如何風樹不寧不令廬墓之側柴毀滅性管輅之

才管輅之命惟國不幸非君之病我鮮于公中肅恭

懿光明不融為君頌德穆如清風日月運安江漢流

東不閉其文永昭文雄 唐大歷六年歲次辛亥

十月癸丑朔日建前監察御史趙儋撰

大唐贈揚州大都督段府君神道碑銘并序

巨唐大歷己未歲春正月段府君之子四鎮北庭涇

原鄭穎等州節度使開府儀同三司御史大夫張掖

郡王曰秀實。追琢貞石。光昭先考。展孝思。旌休烈也。夫流濬者其源長。德克者其後大。更八姓而不膺。五福。府君其人焉。君諱行琛。字行琛。宗周柱史。垂其裔。前漢都尉昌其業。太尉之威懷。戎落驃騎之光啓。冀方。四燕兩魏。高位碩德。扶踈於史牒者。向二百人。以至高門平原忠武王孝先。弼亮北齊。奄荒東夏。恢武經而抗衡西帝。揆文教而師尹南宮。曾門德濬。初罹否運。播遷隴坻。度地肯堂。鬱爲望姓。在周辟奉朝請。入隋直文林館。靖恭厥位。獲沒先朝。大父操。握機未發。早齡卽世。考達。從調夏官。藝極龍豹。致果爲毅。職統熊羆。皆保家之良主。府君生知六行之美。學究五

經之奧。旣齒鄉賦。高標甲科。簡脩獨耀於錦衣。從事  
仍屈於黃綬。學有著位。我實當之。郡有子弟。我實誨  
之。自隴及岐。鼎新儒行。雖東里子產。西蜀文翁。誠存  
物應。蓋未之比。厥有成績。聞於家邦。厭名位而知止。  
賁丘園而用晦。我國家雖右斷匈奴之臂。時脩大刑  
於絕漠之表。旁求百夫之持。永清萬里之外。府君顧  
謂子張掖王曰。爾居能服勤。性成惟孝。出可承命。遊  
且有方。虎穴不探。龜組何獲。爾之元昆介弟。可以供  
指使。我之先人遺業。可以終餘齒。忠不擇事。安實敗  
名。因剛慈以激昂。俾宣力以勤遠。君子謂府君。知愛  
子之道矣。王投筆占募。馳驛徂征。坐籌必勝之畧。動

獲前禽之利。洎王宦登通貴。佐律副軍。銀章已綰。玉  
關未入。府君溫其在邑。樂且有儀。九流百氏。經耳輒  
誦。四憂十義。因心必達。然猶深居自珍。與物爲春。希  
言中倫。知機其神。內葆光以恬真。外行簡以依仁。子  
獲奉親之祿。欲養而不待。身寄有涯之生。遷化而無  
愬。天寶九載。夏之季序。邁疾于汧陽御史里之第。乙  
酉。奄歸無物。其季於斯。七十五稔。夫人樂平狄氏。吳  
山縣丞哲第六之女。心婉志柔。靜專動直。承筐而繁  
衍其實。主奠而敬恭。無忒下壽。初登先時。永逝門子  
祥穎。仲子秀成。季子同穎等。柴立長號。稽謀宅兆。明  
年春孟序辛亥。遷皇祖及諸父之無後者。偕葬於隴。

山東麓柏谷掌。次列三墳。周施一域。送終之禮備矣。屬歲旅天朔。塵驚薊門。徵會沙場之右。殄殲鐵額之醜。王飛郵及國。擗地崩心。夷凶難遂於情禮。哭墓復隨於軍正。既清海裔。又牧回中。一莅疲人。荐彰丕績。廣德二年秋九月乙未。詔追贈府君祕書省著作郎。夫人太原縣太君。恩深歿後之寵。慶表生前之訓。上又以王翊亮三節。綏御七戎。致位崇獨坐之班。成軍雪多壘之恥。大曆十年夏五月。詔加贈府君婺州刺史。夫人太原郡太夫人。十一年冬。舊使尚書左僕射扶風郡王馬璘。遘疾弥留。表王請貞師律。詔仍遷御史大夫。既操二重之權。克施五利之策。平涼安定。曲

荷其高育。先零罕開。遙服其威信。四封無聳。三務有成。十三年五月。命朝丹禁。面疆戎索。帝曰。朕翁孫也。俾寫眞麟閣。橐駝而遣焉。及季夏壬寅。又贈府君揚州大都督。夫人忻國太夫人。榮親揚名。二美兼著。傳曰。子之能仕。父教之忠。詩曰。維其有之。是以似之。見於府君矣。雖封植無改。而銘頌未刊。過聽謬採。于芻蕘。脩詞愧陳。于質要。銘曰。

於穆端士。神所勞矣。貞惠資身。義方訓子。育德無倦。狗名知止。宜其後昆。式是繁祉。繁祉伊何。後昆則然。西服戎胡。東定幽燕。殊勩克著。湛恩上延。贈光三錫。慶洽重泉。熊軾增寵。牛崗啓繇。北控沂源。西馮隴岫。



列塋如始。紀石增舊。淑德清規。終天永茂。

大歷

十四年閏五月庚午朔十三日壬午建朝。請郎檢校尚書刑部員外郎兼鳳翔少尹侍御史賜緋魚袋張增書朝議郎行鳳翔府天興縣尉李同系篆額。

故莫州長豐縣令李君墓誌銘

唐貞元三祀五月。故長豐宰李君丕卒於幽州潞縣。嗚呼逝水。古今悲夫。公隴西人也。世襲軒裳。地清才幹。曾祖知禮。宣州司功參軍。祖懷璧。汴州陳留縣丞。考許州臨陵縣令。公洒然深心。抱義育德。士林咸器重之。乃昌言薦於元戎。遂徵辟爲潞縣丞。佐理高標。令名遠著。後墨綬長豐。化百里之風。樂四人之業。

俄改任莫州司法叅軍。蘇息萌隸。鈐鍵姦譎。凡登仕  
踐位。時議茂宰良掾也。每處其厚。不居其華。果行溫  
良。發言砥厲。豈期餘慶罔祐。而禍兮有階。故鵬鳥作  
孽。二豎爲祟。沉疾於故林私第。即代之日。春秋六十  
有三。無嗣。夫人元氏。晝哭靈帳。恨無三從。傷肝膈之  
痿憤。痛終身之惻獨。長女適河東柳氏。名峴。試太常  
寺奉禮郎。感深仁之厚恩。盡半子之禮節。力窆棺櫬。  
手植松楸。扶塗車。封馬鬣。粵三年。建子月。葬於縣之  
南三里潞水之右。託一片之琬琰。紀平生之徵獻。俾  
山壑之變。風烈有遺。而爲銘曰。

屹然孤墳。長城之東。死生永隔。天地不同。吁嗟英靈。

窮泉之中悄悄原野旦暮悲風

石在通州文昌殿壁近年出土見州志

唐吳郡張常洵紀孝行銘碑

唐

乎

君名常洵字巨川句曲人也其先奕世載德賜姓受氏詳乎家牒炳乎國史矣在昔宣王時則有若張仲孝友周人美之列於風雅在悼公時則有若張老恢晉國之圖拯魏氏之急魯史嘉之編於載冊高祖伯卿曾祖克紹並怡情墳典抗志不仕祖處靜皇湖州烏程縣令考璋皇建州司戶君即建州之第四子也幼而聰明長而岐嶷窮百行之源事父母以孝稟五常之性奉親族以和及父母既歿居憂泣血柴毀骨立躬自建冢高數尋手植竒樹盈千餘本然志戀墳

塋終身洒掃。雖喪紀踰制。而靡釋衰經。乃葺結庵居。於墓次。哀動行路。感通神明。白鶴翔於林中。靈芝生於墓側。鄉黨稱其孝。郡邑嘉其行。錄表上聞。優詔允答。復其徭役。旌其倚廬。三紀於茲。情猶一日。居嘗疾困。殆不勝喪。勺飲不入口者累日矣。其兄常泳勸令飲食。堅執不從。兄謂之曰。有疾飲酒食肉。在禮自有明文。蓋無以死傷生也。今汝異居幽荒之際。而即安於疾。殆至滅性。又焉得爲孝乎。乃曰。吾負終身之憂。匪惟一日之戚。且吾有兄。不患死之將至。兄有子。不患祀之將乏。身旣不賴其生。口豈復食其味乎。君子曰。甚哉。張氏兄弟。孝友之至也。非令弟無以知兄之

賢非仁兄無以成弟之美所及其遠哉上以彰聖朝  
孝禮之至中以表牧宰教化之極下以明張君錫類  
之永此一行也而三善成焉乎雖庸愚備知盛美竊  
以寵錫之命雖行於門閭紀述之詞曾未標於篆  
刻敢直書其事識之貞石焉銘曰

天錫嘉命保佑我唐篤生張君令名是揚令名伊何  
純孝克彰終身在戚執親之喪獨居幽荒廬墓之側  
喪制既踰哀情罔極衰經弗離甘旨靡食疾苦嬰身  
志行不忒節彼高墳巍然如崗草木呈瑞鸞鶴表祥  
孝感之至達於聖皇詔命旌美殊其井疆勒名紀行  
於門之旁千秋萬祀斯風不忘

集古錄有唐孝子張  
常有旌表碣云文字

磨減僅可見其髣髴注貞元五年考孝子父建中四年癸酉歿廬墓六年以明年貞元五年己巳立此碑也別有咸通十三年碑于在句容張氏義臺得其殘石一片後有潤州句容縣令呂倕及咸通十口等字寶刻類編載張府君旌表碑唐王承福書雷珍題額咸通十三年引諸道石刻錄即其碑也今張氏之裔弃于此階下自余拓本以存故迹惜不得其全文併載於此碑所謂節彼高墳者今在義臺西北後人不知是張氏父母葬處指為古冢又為街道民居隔絕僅以廬墓處為孝子祠耳

### 周氏墓誌銘

唐王 紳

夫人姓周氏其先汝南人也爰自炎漢達於有唐縣歷衣冠其來尚矣曾王父府君珪皇承務郎勅授薊州三河縣令王大父府君歸皇宣德郎試左贊善大夫賞緋魚袋兼上柱國王父君彥皇彭城郡高望府折衝賞緋魚袋兼上柱國皆業崇儒行世繼簪組問

次門慶逾長。夫人則折衝府君之長女。幼年貞柔。至性純孝。凜乎正氣。賢行自天。雅量絕儔。風見難並。適佐君子。令淑尤彰。雍睦承家。母儀增書。是以儉恭聞惠和。不以鉛粉益容。但以禮節資德。時貞元辛巳歲。寢疾於莫亭集賢里之私第。伏枕逾月。醫無所爲。以其年五月十三日。奄從於化。享年四十八。嗚呼。天命數盡。生也有涯。哀哉。哲人。何不爲壽。瑤琴絕聽。寶鏡休窺。珍玩滿室。莫之能守。親戚彌切。痛無偕老之期。岐路感傷。嗟有懷仁之德。以其年冬十一月八日。卜兆於鄭城東南二十五里。世業平原之禮也。案盧文弨抱經

堂文集有天寶六載唐故義興周夫人墓誌銘跋曰誌後云以茲吉晨赴杜城東郊之禮也余初疑句有

脫字及觀大<sup>○</sup>原光祿卿主訓墓誌亦云遷厝萬年  
縣澆水鄉澆水原之禮也則當時自有此文法此碑  
云云亦與雲結長川風悲草樹嗣子操次子摸並殘  
彼同例骸毀容能竭孝道慮恐陵谷將變歲序將遷刊石紀  
時其銘曰

郡城東南兮滹水湄歲往月來兮無盡期明明寒月  
兮對孤壠蕭蕭白楊兮悲風吹

唐莫州唐興軍都虞候兼押衙試鴻臚卿鄭府  
君墓誌銘

府君諱玉字廷玉本滎陽人也其先因官得地曾祖  
亮皇莫州司馬祖備涇州四門府折衝王父泰遊擊  
將軍守左武衛大將軍試太常卿咸以文武兼才應



當時之選。府君鄉舉孝廉。弱冠從事。有救世之才。軍府推稱。以政狀聞於本道。時表奏授宣義郎。試恒王府司馬。權充本州孔目判官。吏不敢欺。人樂其業。時歲儉。人飢多盜。世亂思理。須得其人。遂屈充唐興軍左虞候。以屏盜賊。擒奸摘伏。撫弱遏強。井邑肅然。論功授秩。累有拜遷。官至鴻臚卿。職竟都虞候。自主局。向三十年。閭里懷其仁。鄉黨服其義。犬不夜吠。衣錦晝行。水鏡居心。不假灰猪。以辨僞。臨事明斷。有同跪鼠。以懲愆。衆稱才用無窮。又拜牙門將。內外瞻矚。文武繩準。洎貞元十七年。旌麾撫臨。錄侯掩之。錫重。始終之節。賞衣一襲。錫馬一匹。以其州在關外。賴之。

襟帶委以守禦無遷易也鄉人改觀閭里拭目昂昂乎固一時之傑也豈期二豎爲災奪人之願以貞元十八年十二月十九日寢疾終於鄭亭春秋六十有八邑悲巷哭春不相杵夫人河閒邢氏以貞元二年三月四日先府君捐世享年四十有八銀青光祿大夫檢校太子詹事殿中侍御史讓之孫平昌縣令璫之女適配君子義不失於三從奉事舅姑禮乃全於四德爲六親軌範作三族楷模得女適人而宜室生男至孝以承家皆夫人餘慶之所鍾府君義方之所教也嗣子惟興等痛乎松檟未樹歲月遄臻先遠有期不敢違卜奉以貞元十九年歲次癸未十一月戊

寅朔十三日庚寅。祔於州城南二十五里。顧義鄉三方之原。禮也。是日也。素車隨紼。白馬臨棺。雲慘寒天。風悲野樹。恐陵谷變遷。銘以誌之。辭曰。

平原四顧兮塚壘壘。左枕故園兮右滹水。嗚呼鄭君兮來宅此。白楊蕭蕭兮莫風起。何嗟原夜兮自有明珠兮照千里。

清河張府君墓誌銘

唐柳宗元

貞元二十年六月一日。清河張公諱曾。寢疾即世於莫亭嘉深里之私第。享年七十六。自屬纊至於移窆。朋從親暱。州里士君子。無不慟怛。嗚呼仁賢之云亡也哉。惟公受姓。黃而分。歷代茂盛。源流益別。公

即清河之緒。曾祖皇太子諮議郎諱崇。祖皇中府折衝諱操。父皇太子內直郎諱公。公即內直郎嗣也。早歲有節克壯。心拳拳禮容。執無倦。逮夫弱冠。遵道秉義。汪汪然不可得而親。不可得而友。挺出常度。機畧內蘊。時薊州刺史御史中丞榮公。公才最以從事情。以道契。三揖而進。受靜塞軍營田判官。恭儉蒞職。勲績明著。甄錄奏聞。受遊擊將軍。守右領軍衛幽州開福府折衝都尉員外。置同正員。賜騎都尉。公踈勢賊諂。心不苟合。恬淡爲頤年之用。視簪組爲伐性之具。遂辭名晦跡。高卧雲物。因家於三河邑。背郭而東。得林壑之勝。致也。暨乎年逾不惑。以長子

瓊佐鄭亭候嘉聲洋洋多歷年數由是閱實觀政巾  
車以來郡邑清暢禮容大備■釋我願斯不返駕每  
■道人貞士談真空微妙之性探■原迷頤之旨浩  
浩方寸洞豁塵境不其致歟嗟乎大道無涯天命有  
定雖聖明不能越常運而超物外哉公以疾起無妄  
情不嗜藥顛顛居易悔咎莫有星歲幾同大漸長往  
嗚呼天富其道而闕於壽謂之何哉夫人北平田氏  
■而得禮有子二人瓊等卜祔先塋龜筮告吉以其  
年十一月一日窆於任丘東北長丘鄉原禮也二嗣  
號擗痛深泣血哀告以先遠有期請以誌之宗元承  
命不忤刻之貞石銘曰

蘭芷其馨金玉其貞碎而折之何神不明茂旌其英

德立行成悠悠銘旌洋洋懿聲孝子令孫宅兆郊原

龜筮叶從慶流後昆柳子厚文集無此文河開府志云字多缺泐錄在任上舊志邑

人謂今其碑石尚存長豐寺陷置壁間

唐故朝議郎檢校尚書戶部郎中兼襄州別駕

上柱國韓昶自為墓誌銘并序

昌黎韓昶字有之傳在國史生徐之符離小名曰符

幼而就學性寡言笑不為兒戲不能聞記書至年長

不能通誦得三五百字為同學所笑至六七歲未解

把筆書字即是性好文字出言成文不同他人所為

張籍竒之為授詩時年十餘歲日通一卷籍大竒之

試授諸童皆不及之。能以所聞曲問其義，籍往往不能答。受詩未通兩三卷，便自爲詩。及年十一二，樊宗師大奇之。宗師文學爲人之師，文體與常人不同。昶讀慕之，一旦爲文。宗師大奇其文中字，或出於經史之外。樊讀不能通，稍長，愛進士及第。見進士所爲之文，與樊不同，遂改體就之。欲中其彙，年至二十五及第。釋褐，柳公公綽鎮邠，辟之。試宏文館校書郎，相國竇公易直辟爲襄州從事，校書如前。旋除高陵尉。集賢殿校理，又遷度支監察，拜左拾遺。好直言，一日上疏，或過二三文字之體，與同官異。文宗皇帝大用其言，不通人事，氣直不樂者，或終年不與之語。因與俗

乖不得官。相國牛公僧孺鎮襄陽。以殿中加支使。旋拜祕書省著作郎。遷國子博士。因久寄襄陽。以祿養爲便。除別駕。檢校禮部郎中。丁艱服除。再授襄陽別駕。檢校戶部郎中。大中九年六月三日寢疾。八日終于任。年五十七。其年十二月十五日葬孟州河陽縣尹村。娶京兆韋放女。有男五人。曰緯。前復州叅軍。次曰綰。曰緄。曰綺。曰紱。舉進士。女四人。曰茱。曰谿。曰當。曰著。在室。曾祖叡。素朝散大夫。桂州長史。祖仲卿。祕書省祕書郎。贈尚書左僕射。父愈。吏部侍郎。贈禮部尚書。謚曰文公。銘曰。噫韓子。噫韓子。世以昧昧爲賢。而白黑分衆。以委委



爲道而曲直辨。生有志而卒不能就。豈命也夫。豈命也夫。孤子綰書并篆。

唐故滎陽鄭府君夫人博陵崔氏合祔墓誌銘

并序

唐秦貫

鄭之先自周王封舅之地。因而氏焉。別派五流。深源一至。是以滎陽之望。得爲首冠。其下公侯接武。台衡繼迹。雕軒繡軸之榮。羽蓋朱轡之盛。由魯史記。迄於唐春秋。實鄭氏爲衣冠之泉藪也。高祖世。斌皇左司郎中。磁隰二州刺史。新鄭縣開國男。食邑三百戶。曾祖元嘉。皇新都長水縣令。襲封新鄭縣開國男。祖有常。皇吏部常選。襲爵新鄭縣開國男。烈考探賢。皇衛

州昌樂朝城莘縣令。府君諱遇字■皇試太常寺協律郎。文業著於當時。禮義飾於儒行。少有倜儻之志。長負瓌竒之名。不苟譽以求容。每親仁以竭愛。爲中外模範。成友朋宗師。樂善孜孜。不愠知鮮。量苞江瀆。氣合風雲。今之古人。人雖上出。神不優德。配壽胡差。先夫人之亡。蓋卅一霜也。享年六十。夫人博陵崔氏。令門清族。慶餘承善。四德兼備。六親雍和。仁讓得於天真。慈惠立於素尚。母儀內則。動靜可師。禮行詩風。進止成法。雖婕妤女史。大家經教。承之於諷習。推之於行源者。亦異代殊人。其歸一旨。未亡之歎。孀齡杳然。玉没何先。蘭然遽至。以大中九年正月十七日

病終於淇隩之私第享年七十有六以大中十二年  
二月廿七日合祔於先塋之側其鄉里原隰之号載  
於舊記此闕而不書女一人適范陽盧損之嗣子六  
人長曰頊攝汲縣丞知縣事早亡次曰珮早亡次曰  
瑾次曰玘次曰璩次曰琬咸繼以遺芳克修至行銜  
哀茹毒追攀罔極將營護■窆泣告於業文者爲之  
銘云

仕門雙美兮令德咸芳甲族齊茂兮英華克彰允文  
武兮書劔名揚蘊儀度兮閨門譽長珠沈玉沒兮人  
誰靡傷桂殞蘭凋兮共泣摧香垂修名兮允謂不亡  
傳事盛兮多載彌光聽悲風兮松韻連崗刻貞石兮

永志(元)堂。

給事郎試太常寺奉禮郎攝衛州司

法參軍秦貫撰。

又一碑鄭遇作鄭恒疑後人所改。

後魏洛州刺史侍中兼太師昌黎馮王新廟碑

唐馮(元)德

王諱熙字晉國冀州長樂人也伯祖諱跋建國北燕傳位於昭成皇帝諱(宏)即王之烈祖也魏太武帝滅北燕徙其家屬於代王以帝者子孫遂交婚於魏室魏文成帝納王妹爲后即文明太后是也王尚博陵長公主以敦慎博愛歷事三朝累拜冠軍將軍侍中中書監太傅太師之任進爵昌黎王及魏孝文帝即位前後娶王三女且二爲后一爲昭儀文明太后臨

朝王以師傅之重。寵極禁壺。內不自安。求外任。爲洛州刺史。侍中太師如故。洛陽經永嘉大亂之後。宮寺毀廢。王爲政仁恕。而酷信釋教。凡出俸祿。於諸州鎮。建佛圖精舍。合七十二處。今之廟地。舊建北邙寺。乃其一也。今佛圖基址尚存。其寺碑文中。書侍郎賈元壽所製。孝文每登寺讀碑。嘉歎不已。後徵歸代。遇疾而薨。屬遷居洛京。遽詔有司。爲辨喪事。公主先薨。命開其墓。併二柩俱向伊洛。皇太子赴代迎弔。將葬。贈假黃鉞。侍中。督十州諸軍事。大司馬。太尉。冀州刺史。加黃屋。左纁。備九錫。前後羽葆鼓吹。有司奏謚曰武。孝文爲撰誌銘。纁服親臨墓所。以前魏書備載其事。

但不言封樹之處。及廟立之由。墓與廟當不相遠也。其廟豈州人思王之德。衆所建乎。不然。寺沙門所置也。至今爲洛北之望祀。年代寔遠。雖牲牢日享。而室壁侈頽。大中六年六月。洛之豪族孟州長史焦宗美。特捨家財。大新厥宇。兵衛儼列。廟貌益崇。愚別墅寄温谷川。東走十里。直王之廟。每見遠近里社。坎鼓啾管。以趨之。及問王之名位爵邑。皆失其傳。乃乘暇謁拜。碑板堙滅。莫識何從。退尋家牒。考於魏史。是知卽愚之十二代祖也。伏念甘棠勿翦。邵德實思。若非績化深洽民心。卽何能五百年之後。而血祀不絕乎。恐盛烈沈翳。無復彰明。不敢多文。遂斲石重紀。

大

唐咸通八年歲次丁亥十一月壬子九日甲辰刻。十  
二代孫鄉貢進士元德述弟進士元度篆額弟進士  
元錫書。十二代孫元規元旣元範元質元靜并前八  
人同建立孫璋鐫。

唐故左拾遺魯國孔府君墓誌銘并序

唐鄭仁表

咸通十五年三月侍講學士右僕射太常孔公以疾  
辭內署職其元子左拾遺養疾亦病逾二旬太常公  
病少閒拾遺疾亦閒又旬日太常公薨拾遺哭無時  
後七十六日亦終嗚呼求諸古未聞也仁表與拾遺  
同歲爲東府鄉薦策第不中等再罷去明年偕宴於

東堂宴之日。博陵崔公薨。出紫微直。觀風甘棠下。表  
爲支使。校芸閣書。拾遺始及第。乞假拜慶。新進士得  
意歸去。多不伏拘束假限。往往關試不悉集。責曹久  
未畢公事。故地遠迨二千里。例不給告。時僕射太常  
公節制天平軍。以是勤不得請。拾遺曰。人之多言。必  
以我爲宴安。訖春不宴。年少乘喜氣。赤春頭。竟不對  
狎客。持一盃酒。人以其爲難。關試日。都堂中捐別同年。  
徑出青門外。經所爲從事州。入院判案。十日東去。府  
適罷賢諸侯爭走羔鴈。馳弓旌。竟不能致。徵爲渭南  
尉。直(宏)文館。久之。會大學士出將。聲竟不就。僕射太  
常公罷鎮居洛中。拾遺伏安定省。不嘗言仕宦。旋以



萬年尉復怙文職無西笑意僕射徵拜司戎貳卿拾遺由侍行乃赴職越一月今許昌太傅相國襄陽公爲河中奏署觀察判官假監察御史故事赤尉從相府得朱紱殿中公昆仲閒有未至者求裏行官不改服色人人美譚之俄轉節度判官從知之道皎然明白和而不柔守而通內盡匡補而外若不知相君待之異禮俄拜左拾遺內供奉嗚呼止於是何也春秋始卅三矣惜哉公至性自生知雖欲全其禮傳於後開強忍抑不能俯就始得疾不言於人因晡哭若絕左右始知有病句甚矣句卧堊室中不復進饘餌疾益亟方旬歸常所居舍悉召骨肉迫僕使唯言僕射

公葬時事。指揮制度。必以古禮。戒誨約束。委曲備悉。左右皆泣。公曰。吾平生無纖小不是事。天報我甚厚。使亟得歸侍地下。尔盍賀而返。以泣耶。吾自遂性。不能無傷生。全大孝。送終設祀。宜益儉削。無以金鉛織華爲殉。無以不時之服爲殉。吾幼苦學。尤嗜左氏傳。所習本多自讎理。宜置吾左右。友人鄭休範。多知我所執守。相視若親弟兄。我亦常以所爲悉道之。請以誌我。彼不能文。必盡其實。言竟。撫弟妹。若將千百里。爲別者。視妻子。若將一兩夕。不面者。而怡然其容。如有失而復得。已而終。嗚呼。其喜歸侍乎。公謝世之月。餘日前。與二季處閤室中。忽援毫書廿八字于室內。

東展之上。若隱語而加韻焉。曰許下無言奪少年。震而不雨。月當弦。風濤渭逆。舳舻沒。從此無舟濟大川。初玉季載考其義。莫究指歸。既痛絕手足。若洗然而悟。曰許無言。是午字。今歲在午也。震不雨。是辰字。其哀瘵至甚。移歸院就醫。是辰日。及■奄然之日。驗於官。歷是上弦日。又應月當弦之讖也。吁。似有所潛受於冥昧閒。何懸知之若是也。憶於洛陽里第。始相與定交。公曰。何以契我。余曰。死患難。先祿位。託孤寄命。同休共感。此義交也。見善相勉也。見利相遠也。言之而必行。守之而必固。一旦離此。則攻而絕之。使處世爲正人。沒身無怨言。斯益友也。余將與吾子契之。自

是過必相攻。善必相激。相成如恐失。相畏若臨敵。雖朝夕共行止。人不以爲朋比。亦君子之能賢善誘也。嗚呼。公之文之學之精明。道行如雷聲日光。無耳目者。則不知也。公之計始聞。人人如有亡。碩生鉅賢。心死氣脫。道之不行也。天何心焉。公諱紆。字持卿。魯司寇。四十年代孫。繼繼承承。世濟不墜。閒生傑出。磊落相望。曾祖岑。父皇任祕書省著作佐郎。贈司空。祖弒。皇任禮部尚書致仕。贈司徒。父溫裕。皇任檢校右僕射兼太常卿。充翰林侍講學士。冊贈司空。皇妣河東薛氏。族大而顯。先司空公廿八年即世。公娶京兆韋氏。山東清甲家也。有二子。男曰鐵婢。始十歲。甚肖似。憶

與公約生子命名必如兄弟愚之子曰後魯他日鐵  
婢當以還魯字之易云積善之家必有餘慶善之教  
必闡於道儒釋釋固無嗣皇家公家道儒之餘慶也  
公又賢而無祿其後益大以昌女少於男銘曰

嗟嗟夫君嗟嗟夫君孔聖遺允顏回後身高高者天  
幽幽者神幽幽不見高高不聞不見不聞又何足以

云云 鎮海軍節度掌書記將仕郎殿中侍御史

內供奉賜緋魚袋鄭仁表撰并書案唐書載鄭肅子

自高曰天瑞有五雲人瑞有鄭仁表選家多未載  
其文此碑是其撰文書石文既不佳字亦如常存之  
以質後人知誇大之過情也碑中有旁注云去聲又  
云句者二處亦前人未有之體餘唯杜順和尚行記

復見下旁注  
胡旬反耳

唐故清河郡張氏夫人墓誌銘 唐孫 珣

噫夫人姓張氏其淑慎貞素稟自生知退讓儉遜不從於訓祇奉晨夕終始若一吁言乎不豫葬我私室蘭摧春霧蓮墜秋風隙影難迴逝波不返男一人高姐電影未分槿花已落女二人長曰奴哥穠花未開嚴霜暗墮次日郭兒少髮未摠繼我門嗣夫人年四十有三以景福元年冬十二月二十日卜兆於府城之南雲門之下樹丘隴而銘銘曰

日月有度兮生死無常白晝其速兮元夜何長澠水爲鄰兮雲門是鄉千年万祀兮春露秋霜

夫樂

安郡孫珣述

時景福元年歲次壬子十二月辛未朔二十日庚寅  
孫珣紀。

陳公神廟碑

唐齊光乂

在昔隋氏喪君齊人乏主代厄淪胥我大將運匡救  
之謀先州里之義存乎蔽捍用伺昭蘇初志未躋良  
圖奄墜災生福始遺恨如何公諱杲仁字世威誕受  
丕祉其昌來裔有媯之後人莫與京洪惟發靈乃降  
時傑鼎角匿犀之異雄深魁武之姿貫藝造竒無所  
不至立能事於艱虞之際建殊蹤於混亂之秋韞義  
生風鼓動流俗全吳之地幸賴以安招定鄰邦輯寧  
徒旅江湖嚮應懷赴如歸沈法興率衆而來假我鼻

息初規景附末肆傾夷因何匪仁暴戾斯甚自遺覆  
敗竟取淪亡至於敘官遊歷系業事咸不朽跡著無  
方名與日月輪迴功隨載籍舒卷已詳於宣法師所  
製寺碑若乃生志未盡餘勇仍存息氣沴於疵癘降  
精靈於巫覡物靜裁異時無天昏人到於今罔不懷  
德每以公之諱日爰伸仲夏之中展祀建齋所在充  
遍雖掃地以祭且貴慤誠而廟宇未崇寧昭節敬邑  
老慶州都督府永清府左果毅都尉上柱國賜緋魚  
袋張智景與福業寺長老義先等聚族而謀發言同  
人不召而萃邑中之衆實慰我心疇其經營委以財  
物始則運思而斲之丁丁終於用成而新廟奕奕座



盈神氣侍列鬼雄。威深沈以肅然。狀煜爚而疑動。有以底明祗之位。有以昭介祉之儀。及夫沐蘭湯。奠椒醕。揚枹拊鼓。緩節安歌。華彩服與瓊芳。會陳巫與楚舞。求非曲禱。祀必正辭。無紛若之言。致馨香之信。由是上感宸心。旁追祀典。降中使。被懷濡。聖澤覃溥。天光照爛。豈秦祠漢享之類。可得同乎。決速下之祈。演無疆之助。或飲食有訟。或契文不明。凡百無良。深衷莫辨。微見誠請。立彰其效。負者乃凶。竟貽潛匿。攘諍掩息。望境自清。比夏積憊。陽秋淫淫。雨捨我穡事。妨於農收。至於三。至於四。時其賢守李公行。穆民勤卹之意。傍徨匪寧。率領官屬。長史李公昌。司馬丘公

從心晉陵縣令岑公况武進縣令何公據等果至虔誠景刻俱應澤及千里無所不周使君涵道德之尊豐惠和之厚艱難之辰晏然無事豈不以忠信於物而昭明於神乎本宰何公學以入政優于子人深撫育之恩流清白之稱咸思善貺冀荅宏慈神之聽之庶同景福今餘寇未寧尚煩剪滅神而助順靈其運乎昔者聖王之制禮能禦大災能捍大患以勞定國以死勤人則所必祀而明德報功大將生爲司徒足以主世地歿爲貴神足以鎮邪惡閭閻綏祐存亡以之斯所以榮尊故鄉廟食舊國宜矣勒懿跡篆豐珉延光表美寧可闕歟光又策名清時亞位書府宦遊

日久遲暮言歸竊井邑之譽忝文章之目魯無君子  
 斯焉取斯以為傳芳金石不可妄也郡司錄裴公導  
 翰林之寶辭推典麗請以頌記其銘此君為之文曰  
 烈烈司徒為王爪士勇冠諸軍義先州里三綱砥節  
 百行推美所謂伊人南國之紀天厭火德運歸黃祚  
 肇闢乾關未康國步鯨鯢振海楔窳交路偃草江干  
 惟夫子故矛鎚挺擊萬里長城旌旄血灑劍鏑風生  
 夸者貨首同焉盜明雄心不竭終古英靈依然甲第  
 尚想陳跡庭變金地祠開瑤席曰雨曰霽推誠邦伯

案咸淳昆陵志碑碣門云司徒神廟碑乾符三年集  
 賢院學士齊光又撰據此知碑原有年月名銜武進  
 縣志未載無以補全也又案銘詞每段四韻而  
 未段跡席伯僅三韻亦不完蓋以下皆脫去矣

大唐威武軍節度福建管內觀察處置三司發  
運等使特進揀拔太保同中書門下平章事  
使持節都督福州諸軍事兼福州刺史上柱  
國琅邪郡王食邑四千戶食實封壹百戶王  
審知德政碑銘

唐于競

粵自範金合土之制雲師火紀之名禹別九州堯咨  
四嶽莫不東求良輔宏濟兆人彰克勤克儉之能垂  
可久可大之業嗣大叔寬猛之政循仲尼富庶之言  
旣茂勲勞宜標篆刻公名審知姓王氏瑯琊人也其  
胙土命氏疏源演派代濟其美史不絕書後以太祖  
就祿光州因家於是郡焉曾祖友贈光祿卿王父蘊

玉贈祕書少監。父恁贈光州刺史。繼贈太尉。公即太尉之季子也。初公兄潮志尚謙恭。譽藹鄉曲。善於和衆。士多歸之。福建節度使陳巖既嚮其名。又以所屬泉州求牧。乃遣禮而請之。及到任。頗著嘉聲。後巖在軍病甚。不能視事。軍士等懼無統御。皆願有所依從。泉牧遂以郡委於仲弟審邽。而與公偕赴。至則積惡者屏去。爲善者獲安。因詔授節度使。累加檢校右僕射。於是剋其訛弊。整其章條。三軍無譁。萬姓有奉。乾寧三年。僕射溝疾。且付公以戎旅。仍具表奏。尋加刑部尚書。威武軍留後。俄授金紫光祿大夫。右僕射。本軍節度使。公器局端雅。識理融明。稟崧嶠之真精。得

圮橋之妙畧。及膺帝命。寵陟齋壇。細柳連營。旌旗動色。蒲盧蒞政。草樹逢春。一年而足。食足兵再。歲而知禮。知義方隅之內。仰止攸同。曩以運屬艱虞。人罹昏墊。農夫釋耒。工女下機。公旣統藩垣。勵精爲理。強者抑而弱者撫。老者安而少者懷。使之以時。齊之以禮。故得汗萊盡闢。雞犬相聞。時和年豐。家給人足。版圖旣倍。井賦孔殷。處以由庚。取之盍徹。夫述職之道。底貢爲先。九丘爰序於厥苞。伍伯是徵於縮酒。雖旬服之近。江漢之中。或遇阻艱。亦絕輸賦。惟公益堅尊獎。慎守規程。松柏後凋。風雨如晦。地征旁午。天庫充盈。共仰勤劬。咸知匡戴。常以學校之設。是爲教化之原。

乃令誘掖童蒙，興行敬讓，幼已佩於師訓，長皆實於國庠。俊造相望，廉秀特盛，閩川以南，地惟設險，人尚爭雄。或因饑饉，荐臻或以刻剝爲苦，萑苻易聚，巢穴難探。公感之以恩，綏之以德，且曰：吏寔爲虐，爾復何辜？示以寬仁，俾之柔服，遂使數十年之氛祲，遽致廓清。一千里之封疆，旋觀昭泰。張網以單車入壘，虞詡用絳纒擒姦。以古況今，彼猶懷愧。爰自天寶艱難之後，經費實繁，聚斂之臣，名額滋廣。即山鳩利，任土庀財，峻設隄防，頗聞賙贍。洎纏烽燧，仍患崎嶇，三司之職務空存，四海之輪蹄鮮至。公按其程課，令以權衡，盡叶舊規，尤彰宏業。而又奉大雄之教，崇上善之因。

象法重興。導師如在。虹梁雕拱。重新勿利之宮。鈿軸  
牙籤。更演毘尼之藏。而又盛興寶塔。多捨淨財。日麗  
飛甍。霞攢彩檻。頑豔迴向。遠邇歸依。用俾羣緣。皆同  
妙果。佛齊國。雖同臨照。靡襲冠裳。舟車罕通。琛賚罔  
獻。■者亦逾滄海。來集鴻臚。此乃公示。以中孚。致其  
內附。雖云異類。亦慕華風。宛土龍媒。寧獨稱於往史。  
條支雀卵。諒可繼於前聞。自燎熾西秦。烟飛東觀。魯  
壁之遺編。莫採周陵之墜簡。寧存。亟命訪尋。精於繕  
寫。遠貢劉歆之閣。不假陳農之求。次第籤題。森羅卷  
軸。夫四鄰共守。蓋當偃草之期。七德方修。必假禦衝  
之備。是以恢張制度。固護基扃。程功而莫匪子來。作



事而適當農隙立崇墉之百雉表巨屏於一方巖邑  
湯池曾何足數折筯縈帶固不可憑未若暫勞致茲  
永逸兵戈荐起帑庾多虛凡列土壇悉重征稅商旅  
以之而壅滯工賈以之而殫貧公則盡去繁苛縱其  
交易關譏鄽市匪絕往來衡麓舟鮫皆除守禦故得  
填郊溢郭擊轂摩肩竟敦廉讓之風驟覩樂康之俗  
閩越之境江海通津帆檣蕩漾以隨波篙楫崩騰而  
激水途經巨浸山號黃崎怪石驚濤覆舟害物公乃  
具馨香黍稷薦祀神祇有感必通其應如響祭罷一  
夕震雷暴雨若有冥助達旦則移其艱險別注平流  
雖畫鷁爭馳而長鯨弭浪遠近聞而異之優詔獎飾

乃以公之德化所及。賜名其水爲甘棠港。神曰顯靈侯。與夫召神人以鞭石。駢力士以鑿山。不同年而語矣。於戲。辨貞金於大冶。認勁草於疾風。不有良臣。誰康澤國。尋就加平章事。檢校右僕射如故。腰懸相印。手握兵符。益壯軍聲。弥新殊渥。又改光祿大夫。檢校司空。轉特進。檢校司徒。然而物議輿詞。功厚賞薄。以爲爵祿未稱。疇庸於是。異姓分封。仍加井邑。轉檢校太保。瑯琊郡王。食邑四千戶。食實封壹百戶。公之仲兄審邽。自守泉郡。一紀於茲。黠馬皆調。疲人盡泰。公性惟雍睦。氣稟溫和。韻契墳箎。政侔魯衛。可謂高明輝映。超絕一時者也。公以天下兵馬元帥。太尉。中書

令梁王勲格穹昊德服華夷奉大國之歡盟爲列藩  
之表率今節度都押衙程贇及軍州將吏百姓耆老  
等久懷化育願紀功庸列狀上聞請議刊勒元帥梁  
王以公如河誓著匪石情堅累貢表章顯陳保證朝  
廷冀(宏)誘勸特示褒揚將建龜趺合徵鴻藻兢謬居  
清列曾乏雄文頃歲常詠皇華往宣宸旨已於視聽  
親歛徽猷今之執簡濡毫得以研精覃思備陳懿績  
實無媿詞乃作銘曰

日月麗天舟楫濟川內外克乂股肱惟賢淮水長清  
緱嶺方寧慶隨祚遠材爲時生伯氏雄特泉人仰德  
求瘼斯勤頒條有則冠軍被疾付以師律政教翕張

士庶寧謐。懿彼閩越。帥實英傑。地列周封。心馳魏闕。  
聖澤汪洋。元戎啓行。有典有則。爲龍爲光。高懸秦鏡。  
理道自靜。比屋懷仁。連營稟令。航海梯山。貢奉循環。  
務其輸委。毋憚險艱。周征之術。公田什一。約以有程。  
守而勿失。輕徭薄賦。謳歌載路。高掩龍黃。遐追召杜。  
鄉校皆遊。童蒙來求。雅道靡靡。儒風優優。惟虺吹毒。  
久依山谷。罔恣陸梁。竟忻柔服。法寶梵宇。勝因所主。  
崇構斯精。福慶攸聚。佛齊之國。綏之以德。架浪自東。  
驅山拱北。墜簡遺編。繕寫精研。麟臺矗爾。武觀森然。  
畚鍤其勤。雉堞連雲。永制爾敵。用壯我軍。關譏不稅。  
水陸無滯。遐邇懷來。商旅相繼。黃崎之勞。神改驚濤。

役靈祇力保千萬艘。劉驥荀龍墳。篋雍雍。惟邦維翰。  
以侯以公。元帥梁王。武步龍驤。挺彼七德。削平四方。  
公能事大。推心斯在。風雨無渝。歲寒不改。殊勛茂績。  
盡瘁宣力。國之丹青。邦之柱石。位冠台鼎。任隆兵柄。  
重以徽章。寵分異姓。優詔銘功。萬古英風。貞珉是勒。  
垂之無窮。

天祐三年丙寅歲閏十二月一日准

勅建銀青光祿大夫行尚書禮部侍郎上柱國臣于  
兢奉勅撰將仕郎前守京兆府鄠縣尉直宏文館王  
倜書

唐儒林郎試大理評事行幽都府路縣令邊府

君墓誌銘

唐邊魯

惟丙戌之歲仲商之月。又十六日。嗚呼。我先伯父長官。遘疾傾殂於故里。以其月二十四日。攢塗於正寢。欲詢逾月之制。得以送終。繼逢逐鹿之秋。未遑安厝。絲聯歲序。可得而知。粵有朝議郎試大理評事前行鄭州鄭縣令兼侍御史賜緋魚袋慎竒。光祿大夫守刑部尚書行御史中丞上柱國陳留縣開國伯食邑一千五百戶歸讜。即長官之弟姪也。念深同氣。痛切嚴書。因感義於鵲鷓。遂撫心於霜露。特齋餘俸。卜葬先靈。乃謂諸姪孫曰。方今海宇謐寧。三農告隙。俾營遠日之禮。貴就叶龜之吉。若非刊勒。莫紀聲容。其所誌銘。汝當論撰。罔遺其善。弗虛其美。魯仰奉明誨。難

愧匪詞。追往質今。對揚實錄。謹敘長官。姓邊諱敏。字德成。其先陳留人也。本枝百世。代不乏賢。或魚符而列職。或墨綬以聯芳。王父諱行存。順州司馬。神情磊落。閒氣深沉。抱環偉之竒才。蘊中和之至德。妥鍾厥後。實曰俊明。烈考諱承。遇任丘令。孝治承家。溫公秉性。蒞事每勤。於夙夜。臨民恒示於愛威。而教彼子孫。備有趨庭之訓。敬其祖禰。必勤薦享之儀。先妣太夫人。太原郡王氏。天資益秀。婦道彌芳。含茲淑善之風。終啓繁昌之允。恭惟長官。英資倜儻。偉量恢宏。辭才則賈馬無稱。孝敬乃曾顏讓美。當未登顯仕。恒奉溫清。見喜色以問安。露憂容而侍疾。身能禮樂。性存典

墳爰從赴聘於招弓。便可分榮於宰字。擢爲高陽縣令。蒞政之後。嘉問允彰。單父臨民。綽有七絲之詠。中牟作宰。不無三異之稱。及罷任之初。未及踰載。而除官路。縣復起頌聲。屏宣卧虎之威。廳集巢鳩之美。立言必雅。莫常顯己所長。用意絕私。未可屈人之短。大小之物。罔不躬決。聞望俱高。位祿已重。賦潘岳閑居之詠。起陶潛歸去之思。因罷厥官。却訪田里。豈謂景福未終。昊天不佑。碧落之孤雲。易失。風窓之短焰。難停。歷任三十年。享壽五十八。我伯母平昌郡孟氏。亦以不登遐壽。奄逝流光。貞魂諒合於延平。青骨同安於蒿里。有子四人。長日照。故幽都府永清縣令。松筠



定操金玉温身方傳襲慶之榮俄溝涉洹之夢次日  
隱前攝鄭州長史仁義兼資温恭有譽守其祭祀不  
怠厥初次日延徒以積慶韞光未趨顯仕而没幼子  
商裔運州左都押衙以職居鄉外身列陪臣空深怙  
恃之悲莫奉松楸之禮孫子六人讓能去非光又霸  
孫嵐孫天留並謙冲立志詩禮飭身咸懷踵慶之風  
大有興宗之譽孫女三人義姐王師小姐或訖有絲  
蘿或年才齠齕克著雍容之德允■貞順之規於戲  
生而無過歿而有後者其爲長■幼■  
不歌春杵不鳴歸墟也■連車■乃梁鄧之■贈弔  
有■則金張之系以庚申年十一月廿四日安神於

任上縣長上鄉孝慈里靖隧先墳之次禮也靈輻駕  
野丹旒懸空爰開烏兆之塋實掩賢英之墓恭承日  
照嚴旨謹作銘云。

博哉貴胄踵慶於門山河其度金玉其身蘊十善道  
爲百里君立功於國流愛於民豈期遘禍一旦歸魂  
委宅幽壤慮謝音塵爰刊琬琰紀錄其勤日往月來  
兮良銘此地付子孫兮傳揚萬春

此誌不書時代錄附唐末以俟再考

晉故竭誠匡定保乂功臣特進檢校太保右金  
吾衛上將軍兼御史大夫上柱國長沙郡開  
國公食邑一千八百戶食實封一百戶贈太

傅羅公墓誌銘并序

五代殷鵬

夫天地肅物。松柏猶或後凋。郊藪呈芳。芝蘭焉能長秀。故老氏有必摧之歎。仲尼興不實之悲。衆木低而梁棟傾。嚴霜重而祥瑞去。物之有矣。可得喻焉。公諱周敬。字尚素。其先顓頊之允也。封於羅。以國爲氏。地連長沙。因家焉。公即長沙之後也。曾祖讓。皇檢校司空。累贈太師。封南陽王。娶宋氏。封越國太夫人。祖諱宏信。皇天雄軍節度使。檢校太師兼中書令。長沙王。累贈守太師。累封趙王。諡曰莊肅。娶趙國夫人呂氏。先薨。又娶吳國夫人王氏。爲時之瑞。命世而生。倜儻不羣。英雄自許。有唐之末。大盜勃興。鎮守一方。廓清千里。上則忠於社稷。下則施及子孫。烈考諱紹威。皇

天雄軍節度使守太師兼中書令鄴王贈守尚書令  
諡曰貞莊。天地鍾秀，山河孕靈。下筆則泉湧，其文橫  
戈則雷震。其武惠惟及物，明可照奸。曠古已來，罕有  
其比。貞莊有子四人，長廷規，天雄軍節度副大使檢  
校太傅駙馬都尉，少薨。贈侍中。次周翰，義成軍節度  
使，檢校太傅駙馬都尉，亦少薨。贈侍中。次周允，前保  
大軍行軍司馬，檢校兵部郎中，兼御史大夫，柱國，賜  
紫金魚袋。早歷通班，繼爲上介。綽有器業，可奉箕裘。  
公即貞莊公第三子也。性稟淳和，生知禮樂。早失天  
廕，幼奉母儀。秦國夫人劉氏，即故兗州節度使太師  
公之弟三女也。肅雍無比，柔順有聞。示以愛慈，加之

訓導。遂令諸子悉著美名。時梁乾化初。公之次兄方鎮南燕。公時年九歲。秦國夫人歸寧於兗州。太師之宅。遂命侍行。至闕下。梁末主宣召入內。對敷明庭。進退有度。上甚器重之。遂授檢校尚書禮部員外郎。仍賜紫金魚袋。自此恒在宮禁。出入扈從乘輿。與皇親無閒。待立冕旒。多備顧問。無非辯對。深恰宸衷。上尤竒之。其年秋七月。歸南燕。甲戌秋七月。公之次兄薨於滑州之公府。上聞計奏。乃謂近臣曰。羅氏大勲之後。宜賞延。遂命公權知滑州軍州事。檢校禮部尚書。冬十月。上表乞入覲。十一月。至京師。朝謝畢。翌日。有制。授宣義軍節度使。檢校尚書右僕射。年方十歲。位

冠五侯。甘羅佩印之初。未爲少達。王儉登壇之日。已  
是老成。十二月。至自京師。乙亥春二月。鄴中構亂。河  
上屯兵。況處要衝。屬茲征伐。事無巨細。公必躬親。道  
路有頌聲。軍民無撓政。丙子春二月。移鎮許田。加檢  
校尚書左僕射。是歲。公年始十二。作事可法。好謀而  
成。政絕煩苛。人臻富壽。忽下徵黃之詔。俄詣會尸之  
期。戊寅秋七月。朝于京師。有詔尚主。公拜表數四。辭  
不獲免。遂授檢校司空守殿中監駙馬都尉。壬子冬  
十月。出降。普安公主。傅粉何郎。晨趨月殿。吹簫秦女。  
夜渡星橋。一時之盛事。難儔千古之清風。盡在癸未  
春三月。除光祿卿。冬十月。唐莊宗收復梁園。中興唐

祚屬當郊祀無失職司遂封開國侯加食邑三百戶  
至明宗募紹之初除右金吾衛大將軍充街使秋九  
月轉左金吾衛大將軍充街使執金在彤庭之前佩  
玉向丹墀之上仕宦之貴無出於斯上以公久居環  
衛之班頗著警巡之効至戊子二月有制授匡國軍  
節度使加檢校司徒仍賜耀忠匡定保節功臣下車  
之後布政惟新福星爰照於左馮暖律又來於沙苑  
庚寅夏四月上以圓丘禮畢慶澤溥行就加檢校太  
保仍降璽書其年冬十一月朝于京師除左監門衛  
上將軍九月轉左領衛上將軍辛卯夏六月轉左武  
衛上將軍癸巳五月除左羽林統軍甲午春加特進

階封開國公。食邑二百戶。改賜竭誠匡定保乂功臣。丙申九月。唐廢主以汴師北征。命公以所部禁旅。巡警夷門。公英斷不回。至仁有勇。當危疑之際。立鎮靜之功。浚郊之民。于今受賜。今皇帝并門鳳舉。洛水龍飛。力願推崇。首來入覲。上嘉其懿効。旌彼殊庸。遂除右金吾上將軍。美哉。出揔藩宣。入居嚴衛。外則作疲民之藥石。內則爲天子之爪牙。文武兩班。踐揚將遍。物禁太盛。古之有言。壽年未高。染疾不起。以天福二年七月二十七日。薨於汴州道德坊之私第。享年三十有三。嗚呼。皇天莫問。徒云輔德之言。大夜何長。共有殲良之歎。上聞所奏。惻怛哀慟。輟視朝兩日。厚加



贈幣。贈太傅君臣之義。終始克全。公以己丑歲五月。梁普安公主薨於同州。後再娶東海郡徐氏夫人。即故東川節度使太師弟五女也。蕙質蘭姿。懿德令範。孰念孤鸞之歎。自傷黃鵠之歌。公有姪延。見任閑廡副使。即魏博副大將軍侍中之子也。朴玉其儀。渾金其器。度。相。貌。人。欽。公亦三子四女。長子延賞。守太子舍人。次延緒。次延宗。皆稟庭訓。悉紹家聲。龍駒鳳雛。得非天性。良金瑞玉。自是國楨。終天懷風樹之悲。踏地有蓼莪之痛。長女適郝氏。次適婁氏。二女方幼。諸子皆普安公主之出也。公主靜惟閑雅。動有規儀。休聲首冠於皇親。淑德

克彰於婦道。帝王之女。無以過焉。公性不好弄。幼善屬文。嚴毅而至和。溫恭而難犯。言惟合道。動不違仁。張充一變之年。已功成名遂。潘岳二毛之日。乃善始令終。以丁酉歲冬十月六日。安葬於洛陽縣之原。禮也。孤子延賞等泣告鵬曰。公之履行。爲衆所知。公之勲庸。歷代罕比。若非故舊。孰能縷陳。鵬列親表之間。受顧念尤最。難避狂簡。輒勒貞珉。序不盡言。乃爲銘曰。

積慶之門。挺生竒傑。入覲堯庭。出持漢節。十乘啓行。萬夫觀政。宵旰無憂。袴襦入詠。英華發外。清明在躬。惟忠惟孝。立事立功。滑臺去思。璧田來暮。藹然休光。

綽有餘裕。擣繡文翰。傅粉容儀。承顏紫禁。飛步丹墀。門盛七葉。祿逾萬石。外冠時英。內光帝戚。歷事累朝。薦逢多難。動有成功。舉無遺算。秋敗芳蘭。地埋良玉。山雲晚愁。林風夜哭。王孫一去。今不復還。陵園草色。今秋黃春綠。

朝議大夫行起居郎充史館修撰

桂國殷鵬撰并書。

羅周敬傳見薛居正五代史九十一

紹之初除右金吾衛大將軍充街使則薛史歐史俱稱歷左右金吾

大將軍在莊宗時誤也

臨卽教授程伯剛墓誌銘

朱劉光祖

吾友程公說字伯剛眉之丹稜人居於敘之宣化伯剛靜而文方教授臨卽官滿成都臺府爭辟舉之聞

逆曦以屬叛，毀車馬，棄衣冠，即日逃歸，入門而號，以白其父。其父與宣化令始知之，相與驚憤，不能食。伯剛白有司，乞休官侍親，入深山。若將避世者，對客輒流涕。其弟公碩，字仲遜，時分教益，冒艱危中，誓不辱賊。賊平，而伯剛以積憂傷，且方奔避時，失食飲節，忽忽病，醫誤投之藥，汗不止，遂死。開禧三年三月二十二日也。年三十有七。仲遜丐檄，走哭喪次，與其父相向慟。已而父收涕，語曰：「若兄之未生也，吾夜夢立門外，一青衿童子，挽吾衣曰：『我爲公嗣。』問其所從來，則曰：『我青神先生兒也。』」明年而若兄生，長而父師，不煩於教。當此變亂，與汝隔不相聞，若兄入縣西北安固。

山爲終焉計。不復問家事。但攜所著春秋諸書。以自隨。謂諸弟曰。我嘗遊青城。大面諸山。徘徊不忍去。去之三年。日往來於懷也。今此山遠城市。茂草木。吾心有感焉。語未既。泣數行下。曰。妖氣未除。世路艱棘。吾欲從此逝矣。疾革。父母問所欲言。無他語。但云仙階淺。未足以成功名。荅其弟。其子亦然。殮之夕。從弟仲藝夢。若兄言。我故青城山人也。吾父乃以爲眉之青神。宜爲我一正其誤。先是。汝兄方之少城。出門連夕。雪。汝弟公辰夢一黃衣。告以兄所辟兩闕。俱非。當授青城山見次。哀哉。數事如合券。吾兒之生死如此。復相向慟失聲。其卒之明年。嘉定元年十月乙酉。葬之。

於縣西馬泉山之原。仲遜授學於伯剛。伯剛與仲遜同年舉進士。既仕矣。俱以所學。孳孳質於余。伯剛骨秀而神清。尤積學苦志。平生於春秋一書究之。反覆不厭。有春秋分記九十卷。左氏始終三十六卷通例二十卷。比事十卷。勤矣哉。而未嘗止也。又取諸儒講解鈎纂之名曰精義。病中猶不去手。書未及成而卒。伯剛性恬潔。居無惰容。得伊洛諸書。服膺焉。不臻其極不已。有語錄二卷。士訓一卷。詩文二十卷。程氏大宗譜十二卷。此其爲志何如也。自伯剛率諸弟以學。連二舉。兄弟同薦者五人。伯剛凡兩薦登科。時年二十有五。既與其弟各調官待次。杜門潛心。人罕識其

面曰它日欲求此樂不可得也。及試吏廣都簿。遇事人服其公清。部使者傅寺丞使代老令。理其縣。吏不敢侮。邛州號多士。伯剛掌教不肯苟。不使郡太守奪其職。宇文侯下車。始得以經訓古道從事。士風遂振。鄉長老李德秀盛稱之。凡號端方士。皆深知伯剛。伯剛則行其所學。非苟求知者也。不幸蚤世。以通直郎賁其終。伯剛之父名符孫。蓄學不售。祖諱志行。少豪於才。以承信郎鎖其廳。薦居詞賦首。曾祖諱準。兩貢辟廡有聲。六世祖自汴歸蜀。愛郁鄆山川而居焉。今宣化是也。伯剛之母魚耶孫氏。有賢德。妻犍爲王氏女也。二子長曰元子。前伯剛七年卒。次曰光老。女曰


寧前一月卒。次日嘉伯剛之葬也。仲遜無以塞其父之悲。乃來請銘。銘曰。

祠西之峯。有翩其童。暫下人世。兮還山無蹤。曷不少俟。以遊夫蓬萊道山之宮。曰吾未足以成功也。獨留遺冢與遺書。使思子兮無窮。我爲勒銘。識其幽封。月明山空。魂其歸來。蕭蕭松風已矣乎。聊託吾文慰而翁。無索之於杳冥之中。春秋分紀勝近人大事表遠甚惜通志堂未曾彙入經解

又無好事者刊刻單行今錄載公說墓誌使世間知此書庶幾終傳於後尔

續古文苑卷第十九





續古文苑卷第二十

賜進士及第授通奉大夫山東通省督糧道加三級孫星衍撰

誄

大司馬吳漢誄

漢杜篤

篤以為堯隆稷契舜嘉皇陶伊尹佐殷呂尚翼周若此五臣功無與疇今漢吳公追而六之乃作誄曰

朝失鯁臣國喪爪牙天子愍悼中宮咨嗟四方殘暴公不征茲征茲海內公其攸平泯泯羣黎賴公以寧勲業既崇持盈守虛功成即退挹而損諸死而不朽名勒丹書功著金石與日月俱業此蓋未全故征茲句不協韻

和帝誄

漢蘇順

天王徂登率土奄傷如何昊穹奪我聖皇恩德累代  
乃作銘章其辭曰

恭惟大行配天建德陶元二化風流萬國立我蒸民  
宜此儀則厥初生民三五作綱載藉之盛著於虞唐  
恭惟大行爰同其光自昔何爲欽明允塞恭惟大行  
天覆地載無爲而治冠斯往代往代崎嶇諸夏擅命  
爰茲發號民樂其政奄有萬國民臣咸秩大孝備矣  
闕宮有恤由昔姜嫄祖妣之室本枝百世神契惟一  
彌留不豫道揚末命勞謙有終實惟其性衣不制新  
犀玉遠屏履和而行威稜上古洪澤滂流茂化沾溥  
不慙少留民斯何怙獻歎成雲涕泣成雨昊天不弔

喪我慈父。

萬年公主誄

晉左九嬪

昔蒲衣早智。周晉夙成。咸以岐嶷名存。典經猗歟。公主在幼。尅哲方德。比齒有邈。先烈何德之盛。而年或闕。何華之繁。而實不結。雨墜風逝。形影長滅。赫赫京室。河洛所經。陰精發曜。降茲淑靈。篤生公主。誕膺休禎。秀生紫微。日暉月明。紅顏鬢髮。金質玉形。太平據覽一百五十四引補既睇艷姿。徽音孔昭。盼倩其媚。婉曼其嬌。寵玩軒陛。如瓊如瑤。雖則弱齒。雙德兼苞。五福所集。聞之先民。積善鍾慶。祐德輔仁。宜終淑美。光暉日新。云何降戾。景命不振。曄曄榮曜。英蕤始芳。何辜于天。

猥遇降霜。煢煢稚魂。飄飄遐翔。於戲何辜。痛茲不福。  
生而何晚。歿而何速。酷矣皇靈。謬哉司祿。嗚呼哀哉。  
日月載馳。白露凝結。自主薨徂。奄離時節。吉凶乖邈。  
存亡異制。將遷幽都。潛神永翳。嗚呼公主。魂豈是綏。  
岌岌靈輜。駿駟駢駢。挽僮齊唱。悲音激摧。士女歔歔。  
高風增哀。一日不見。採蕭作歌。況我公主。形滅體訛。  
精靈遷逝。幽此中阿。言思言念。涕淚滂沱。嗚呼哀哉。

弔文 哀詞

弔張衡文

漢 禰衡

南岳有精。君誕其姿。清河有理。君達其機。故能下筆。  
辭繡。揚手文飛。昔伊尹值湯。呂尚遇旦。嗟矣君生。而

獨值漢蒼蠅爭飛鳳凰已散元龜可羈河龍可絆石  
堅而朽星華而滅唯道興隆悠永靡絕君  
音永浮河水有竭君聲永流周旦先沒發夢孔丘余  
生雖後身亦存遊士殞知己君其勿憂

弔夷齊文

魏糜元

少承洪烈從戎於王側聞先生餓於首陽敢不敬弔  
寄之山岡嗚呼哀哉夫五德更運天秩靡常如有絕  
代之主必有受命之王故堯德終于虞舜禹祚殄于  
成湯且夏后之末祀亦殷氏之所亡若周武爲有失  
則帝乙亦有傷子不弃殷而餓死何獨背周而深藏  
是識春香之爲馥而不知秋蘭之亦芳也

二句御所覽無

在誰路而子絕之。首陽誰山而子匿之。彼薇誰菜而子食之。行周之道。藏周之林。讀周之書。彈周之琴。飲周之水。食周之茶。而謗周之主。謂周之淫。是誦聖之文。聽聖之音。居聖之世。而異聖之心。嗟乎二子。何痛之深。

二句御覽無。案隋書經籍志。梁有散騎常侍康元集五卷七。

溧陽侯陶謙哀詞

吳張昭

猗歟使君。君侯將軍。膺秉懿德。允武允文。體足剛直。守以溫仁。令舒及廬。遺愛於民。牧幽暨徐。甘棠是均。憬憬夷貊。賴侯以清。蠢蠢妖寇。匪侯不寧。唯帝念績。爵命以章。既牧且侯。啓土溧陽。遂升上將。受號安東。將平世難。社稷是崇。降年不永。奄忽殂薨。喪覆失恃。

民知困窮，曾不旬日，五郡潰崩。哀我人斯，將誰仰憑？  
追思靡及，仰叫皇穹。嗚呼哀哉！  
建康志：溧陽侯陶謙墓在溧陽。考證云：後漢獻帝興平元年，溧陽侯陶謙卒，且葬張昭哀之。其詞曰：云云。

### 晉成帝哀策文

宸極寥廓，聖靈遐之。哀備物之虛在，痛永往之無期。乃命史官，述德寄辭。其辭曰：

五德代興，素靈啓曜。離光疊暉，三辰重照。明明我皇，含貞挺妙。  
元秀夙達，履德罔違。鳳棲遐邈，神宇凝夷。文明外潤，仁簡內綏。舉無遺中，鑒無幽微。韻隆汾陽，道侔垂拱。靜恭清穆，冥功日用。豐疊神軌，同天攸緝。爰有陽九，紀綱中替。姦豎肆逆，牢羅失衛。升降艱難。



協應神契靈祚既保顯揚天命雰霧朝晞兩儀開鏡  
訓諮阿衡虛己絕正九功潛流七德將表方振宏羅  
稜威電掃芟蕩神衢一我王道昊天不弔降茲大悔  
天傾其儀地覆其載大業未究神爽遷背哀貫三靈  
痛流萬代爰初不豫大漸在躬啓手歸全神氣夷沖  
凝哉達識體正履終袞龍既襲玉容斯幽登醪虛設  
觴爵靡酬墳牘莫啓聖迹誰修冥冥我皇神焉何遊  
撫膺遐叫迸涕交流三筮告期將歸陵墟陞殞羽翼  
庭納龍輿玉輪動運錫鸞鳴衢錫旆徘徊六驥踟躕  
輕雲蔭舉流風翼車哀哀同軌唯唯輓夫長號永慕  
泣涕漣洳大塊獨運終歸其始我后永往寧神于祀

悠悠上天。煢煢惟已。渺然靡憑。廓焉無恃。目範令儀。徽音在耳。

晉孝武帝哀策文

晉王 恂

同軌畢至。百司胥亞。法物夕陳。輶輦夙駕。親執饋奠。長號永夜。懼鼓刻之。遄盡哀良辰之。莫借悲宮宇之。寥廓痛聖儀之。幽化。夫至德無名。固理絕稱。謂然祝史陳辭。亦臣子所貴。寄窮情於翰墨。庶遺塵之髣髴。其辭曰。

惟皇作極。五德迭允。康實復夏。武亦隆晉。亶亶太宗。希夷其韻。鏡之者元。撫之者順。於穆皇考。嗣徽絕軌。前聖後哲。契合一揆。心去其伐。行遺其美。廢華任誠。

捨荃存旨。惟深通志。羣方咸秩。惟幾成務。能事斯畢。  
未若我皇。至則不疾。恢恢天網。䟽而莫失。居有以虛。  
宰多以少。簡則可從。靜則不擾。信及豚魚。澤被億兆。  
湛然司契。坐一八表。園陵既衛。威靈赫赫。子來既構。  
寢廟奕奕。武曰止戈。戎不極役。文教聿修。有恥且格。  
迹有遠邇。感無高深。道之所被。改色革音。皓獸馴苑。  
素羽棲林。殊柯通理。異蒂同根。方融元液。陶鑄斯民。  
雲韶候奏。比屋思淳。積祐莫應。天罰奄臻。太山頽構。  
洪瀆竭津。何殃之甚。何酷之殷。自罹旻凶。二氣代變。  
霜繁廣除。風迴高殿。帷幙空張。肴俎虛薦。極聽無聞。  
詳視罔見。人神道殊。吉凶有禮。龜筮參謀。埏隧告啓。

史臣考吉。警者在陞。攀援忪忪。惟兄及弟。龍輿肅以  
引邁。前驪紛以抗旒。城闕儼以整列。馳道亘以通修。  
悲平昔之所幸。豈斯路之復由。輓哀唱以翼衡。駟悲  
鳴而顧軻。違華宇之晰晰。即永夜之悠悠。奉靈櫬而  
長訣。緬終天而莫收。訴穹蒼以叫踊。洞五內其若抽。  
儻性命之可贖。甘人百於山上。茫茫大運。靡始不終。  
哲王遺世。貴在道融。昭哉我皇。萬代流風。良史式述。  
德音永隆。

弔嵇中散文

晉李充

先生挺邈世之風。資高明之質。神蕭蕭以宏遠。志落  
落以遐逸。志尊榮於華堂。恬卑靜於蓬室。寧漆園之

逍遙安柱下之得一寄欣孤松取樂竹林尚想榮莊  
聊與抽簪味孤觴之濁醪鳴七絃之清琴慕義人於  
元旨詠千載之徽音凌晨風而長嘯託歸流而永吟  
乃自足於上壑孰有愠乎陸沉馬樂原而翹足龜悅  
塗而曳尾疇廟堂之是榮豈和鈞之足視凡先生之  
所期羌元達於遐旨尚遺大以出生何殉小而入死  
嗟乎先生逢時命之不丁冀後凋於歲寒遭繁霜而  
夏零滅皎皎之玉質絕琅琅之金聲援明珠以彈雀  
損所重而爲輕諒鄙心之不爽非大雅之所營

弔比干文

後魏孝文帝

唯皇構選中之元載歲御次乎闍茂望舒會於星紀

十有四日。日唯甲申。予揚和淇右。蹀駟鄘西。指崧原  
而搖步。順京途以啟征。路歷商區。輅屆衛壤。泛目睇  
川。縱覽觀陸。遂傍睨古跡。游瞰曩風。觀殷比干之墓。  
悵然悼懷。案讀當於此字句絕焉。乃命馭駐輪。筭驥躬矚。荆棘  
隳荒朽。工爲緜蕝。義字而遺猷。明密事若對德。慨狂后  
之猖穢。傷貞臣之婞節。聊興其韻。貽弔云爾。 曰  
三才之戢元亨。敷五靈以扶德。含剛柔於金木。資  
明闇於南北。重離耀其炎暉兮。曾坎司元以秉黑。伊  
稟常之懷生兮。昏睿遞其啟則。晝皎皎其何朗兮。夜  
幽幽而致弊。哲人昭昭而澄光兮。狂夫黜黜其若翳。  
咨堯舜之耿介兮。何桀紂之猖敗。沈涵而不知甲兮。

終或弑己以貽戾。謗謗兮比干。藉胃兮殷宗。含精兮  
誕粹。寘樹兮英風。粟蘭露以滌神。滄藥菊英而儼容。  
茹薜荔以蕩識。佩江蓠而麗躬。履霜以結冰兮。卒窘  
忠而弥濃。千金豈其吾珍兮。皇輦寔余所鍾。奮誠諫  
而燼軀兮。導危言以豐鋒。嗚呼哀哉。嗚呼哀哉。惟子  
在殷。實爲樑棟。外贊九功。內徽辰共。匡率袞職。德音  
遐洞。周師還旆。非子誰貢。否哉悖運。邁此不辰。三綱  
道沒。七曜輝泯。負乘竊器。怠棄天倫。懷誠齋怒。謹言  
烏陳。晁侯已醢。子不見歟。邢侯已脯。子不聞歟。微子  
去矣。子不知歟。其子奴矣。子不覺歟。何其輕生。一致  
斯歟。何其愛義。勇若歸歟。遺體旣灰。不其惜歟。永矣

無返不其痛歟。嗚呼哀哉。嗚呼哀哉。夫天地之長遠  
兮。嗟人生短。旋多殃。住往者子弗及兮。來者子不厭  
。當胡契濶之屯。亶兮。值昏化而永良。曷不相時以  
卷舒兮。徒委質而巔顛亡。雖虛名空傳於千載。詎何  
勲之可揚。奚若騰魂以遠逝。飛足而歸昌。得比肩於  
尚父。卒同協於周王。建鴻績於盛辰。啟肯宇於齊方。  
闡穆音乎万祀。傳寃鞫業以脩長。而乃自受茲斃。視  
竅殷柔。辨剖心無補。迷機喪身。脫非武發。封墓誰回。  
嗚呼介士。胡不我臣。重曰。世昏昏而溷濁兮。日  
謁謁其無光。時坎廩而險隘兮。氣僚颺以飛霜。子奚  
其不遠逝兮。侘傺而耻故鄉。可乘柁柁以浮滄兮。求



蓬萊而為糗。銜芝條以昇虛兮。與赤松而翱翔。被芰荷之輕衣兮。曳扶容之蒨裳。循海波而澍颺兮。望會稽以歸禹。紐蕙芷以為紳兮。扈荃佩而容与。寫鬱結於聖人兮。暢中心之祕語。執垂益而談卡。拜兮。交良朋而憶據字金石文字苦言既而東騰兮。吸朝霞而長舉。登此巖而悵望兮。眺扶桑以停佇。謁靈威以問路兮。乘谷風而扳宇。遂假載於羲和兮。憑六螭以南。南處翫衡嶽而頽步兮。濯沅湘以自潔。嚼炎州之八桂兮。踐九疑而遙襲。即蒼梧而宗舜兮。拂埃霧以就列。採輕越而肅帶兮。切寶犀以貫介。訢辯淳風之淪覆兮。話蕭韶之湮滅。召熊羆而叙釋兮。問重華之風

聚尔乃飲正陽之精氣兮遊丹丘而明視捐捐祝融  
而求鳥兮御朱鸞以脩指因景風而凌天兮迴靈鷁  
籬以西履降黃渚而造稷兮慰稼穡之艱難訪有郢  
之詵詵兮遇何主而獲安然後陟崑崙之翠嶺兮攀  
瓊枝而槃桓步懸圃以溜澆兮咀玉英而折蘭歷崦  
嵫而一顧兮府俯沐髮於洧盤仰從縱倚於閭闔兮  
請帝闔而啟關天沈寥而廓落兮地窈窕而遼闊滄  
淪陰以裨氣兮佩瑤玕而鳴鏘拜招矩而脩節兮少  
躊躇以相羊祈驥驥而揔韉兮隨泰風以颺揚瞰不  
周而左旋兮縱神駟以北望尋流沙而騁鑾轡兮暨  
陽周以緹駕靡芸芳以馥體兮索夷杜而桓衙奉軒

輅而陳辭兮。申時俗之不暇。適岐伯而脩命兮。展力  
牧以問霸。歛沆瀣之純粹兮。闕彌寒門之層冰。聆廣  
莫之颺。飄瑟兮。覲黔羸而迴凝。擁元武以涉虛兮。瓦  
神寘而威陵。象曖曖而晦鬱兮。途曷曷其難勝。英飛  
廉而前驅兮。使燭龍以輝澄。歸中樞而睇睨兮。想元  
漠之已周。慨飛颺之無寄兮。颯翔袂而上浮。引雄虹  
而登峻兮。揚雲旗以軒遊。躍八龍之蜿蜿兮。振玉鸞  
之啾啾。攀彗星以朗導兮。委升軻乎大儀。敷重暘之  
帝宮兮。凝精魄於旋曦。扈陽曜而靈脩兮。豈傳說之  
足竒。但至槩之不悛兮。寧溘死而不移。

告泰華府君文

唐韓賞

惟廿七祀孟秋。右補闕韓賞敢昭告于泰華府君祠廟。惟天地生于人。惟山川主乎神。人有識而神有靈。人貴聰而神貴明。於昭靈山。與天竊冥。載在祀典。鎮于上京。自古帝王。徵應不一。荒淫者神降之凶。聖哲者神授之吉。惟茲臣庶。鑒乎得失。今予小子。造于神祠。將有所盟。神其聽之。人有嗜好。各爲私禱。顧無所求。唯道是憂。今者內禱於身。外盟於神。如有一心。公朝戮力。生人惟神。是福。崎嶇世道。僂俛在位。惟神所殛。必將忘身奉國。爲本圖憂。國濟人爲己任。明明泰華。昭鑒于茲。瞻彼牲牢。抑惟常禮。神嗜正直。意存精誠。正直以享神。精誠以享意。拳然跼慮。瞿然改容。益

靈山之嵯峩增壽宮之肅穆歷階趨進髣髴其形尚  
饗 天寶元年歲次壬午四月乙亥朔十日甲申  
正議大夫太僕少卿兼太山別駕闕諸王侍書榮王  
府司馬韓擇木書

祭文

釋奠祭孔子文

晉庾亮

維咸康三年荆豫州刺史都亭侯庾亮敬告孔聖明  
靈詩書煥於唐虞憲章盛於文武然後黎民時雍彝  
倫攸敘幽厲積構玉繩絕紀高岸爲谷六合錯否上  
凌夷而失教下苟免而無恥公以元聖之靈應感圓  
通萬物我賴匪我求蒙夫子既沒洪範垂流秦雖慢

道漢聿孔修。洎我皇晉。仰欽大猷。宗聖既建。遐胄俾  
侯。令月吉辰。祇陳大禮。磬管鏘鏘。威儀濟濟。嘉莫既  
設。欽若靈規。心存鳳德。尚想來儀。神其歆之。降鑒在  
斯。

祭牙文

晉表 宏

天生五才。治道所司。廢一不可。靜亂輔時。赫赫晉德。  
乃武乃文。中世不競。王度暫屯。戎狄滑夏。虔劉生民。  
蠢爾東胡。被髮左袂。思我皇澤。稽首海表。受爵納貢。  
服膺累世。後嗣不恭。實叛實戾。侵我神畿。隔我嘉惠。  
哀彼黎民。嬰此彫殘。沉荷大寵。任其艱難。慨然發憤。  
撫劍忘飡。敢建高牙。烈烈桓桓。

祭梁鴻文

晉周穎文

晉隆安四年陳郡周穎文以蘊藻行潦祠于梁先生之墓夫子邁志箕穎塵垢雕俗骨秀風霜性淳寡欲娶待偕隱之儷文絕陪臣之錄遂負策周魯之郊逆旅吳會之阿可謂高奇絕倫孤生莫和者也後學撫牘得人在文忽以知命而展其墳茫茫積草有馥餘芬昔先生過延陵而想季經海隅而感連苟踐跡而趣合亦斷金於當年

祭夫文

梁徐悱妻劉氏

維梁大同五年新婦謹薦少牢於徐府君之靈曰惟君德爰禮智才兼文雅學比山成辯同河瀉明經

擢秀光朝振野調逸許中聲高洛下含藩度陸超終  
邁賈二儀旣肇判合始分簡賢依德乃隸夫君外治  
徒奉內佐無聞幸移蓬性頗習蘭薰式傳琴瑟相酬  
典墳輔仁難驗神情易促電碎春紅霜雕夏綠躬奉  
正衾親觀啓足一見無期百身何贖嗚呼哀哉生死  
雖殊情親猶一敢遵先好手調薑橘素俎空乾奠觴  
徒溢昔奉齊眉異於今日從軍暫別且思樓中薄遊  
未反尚比飛蓬如當此訣永痛無窮百年何幾泉穴  
方同

祭陳伯玉文

唐盧藏用

子之生也珠圓流兮玉方潔子之沒也太山頽兮良



木折士林聞寂兮人物踈門館蕭條兮賓侶絕嘆佳  
城之不返辭玉階而長別嗚呼置酒祭子子不顧沈  
聲哭子子不迴唯天道而無託但撫心而已摧

雜文

用筆法

秦李斯

夫書之微妙道合自然篆籀以前不可得而聞矣自  
上古作大篆頗行於世但爲古遠人多不詳今斯刪  
畧繁者取其合理參爲小篆凡書非但裹結流快終  
藉筆力輕健蒙將軍恬筆經猶自簡畧斯更修改望  
益於用矣用筆法先急回後疾下鷹望鵬逝信之自  
然不得重改如游魚得水景山興雲或卷或舒乍輕

乍重善思之此理可見矣。

斯善書自趙高已下。

咸見推伏刻諸名山碑璽銅人並斯之筆斯書秦望紀功石云吾死後五百三十年間當有一人替吾跡焉。  
一本作九年

僮約

漢王褒

蜀郡王子淵以事到湔止寡婦楊惠舍惠有夫時奴名便了子淵倩奴行酤酒便了拽大杖上夫冢巔曰大夫買便了時但要守家不要為他人男子酤酒子淵大怒曰奴寧欲賣耶惠曰奴大忤人人無欲者子淵即決買券云云。  
案本誤不重今補 奴復曰欲使皆上券不上券便了不能為也子淵曰諾券文曰神爵三年正

月十五日資中男子王子淵從成都安志里女子楊

惠買亡夫時戶下髯奴便了決買萬五千奴當從百

役使不得有二三言晨起早掃食了洗滌居當穿白縛

箒裁孟鑿斗浚渠縛落鈕園斫陌葉向絕章樵誤以

知落陌杜埤音苑地刻大枷屈竹作杷削治鹿盧出

入不得騎馬載車蹠坐大叟下床振頭捶葉本誤鉤

此字依藝刈芻結葦臘纒汲水此二字依酪佐此字

學醜音苑祖醜音苑摸織履作麤黏雀張烏結網捕魚繳

鴈彈鳧登山射鹿入水捕龜後園縱養鴈鶩百餘驅

逐鴝鳥持梢牧猪種薑養芋葉本誤長育豚駒糞除

堂廡此二字依餽食音苑伺馬牛鼓四起坐夜半益芻

二月春分被隄杜疆落桑皮梭御覽注云梭拊櫛也

種瓜作苑昨音御覽注云音鑿瓠別茄披葱焚槎發芋御覽注云蜀土

收芋皆窖藏之至春乃發壘集破封日中早黃苑復音○案此字未詳御覽在所不

引中無以訂之章樵本作斐然與復音不合也雞鳴起春調治馬戶兼落三

重御覽注云馬戶水門也蜀每以落置水流養魚欲食乃取之舍中有客提壺行

酤汲水作舖苑哺音滌杯整按園中拔蒜斷蘇切脯築

肉臠芋膾魚包鼈烹茶盡具已而此字依初學記蓋藏關門

塞竇餽猪縱犬勿與鄰里爭鬪奴但當飯豆飲水不

得嗜酒欲飲美酒唯得染脣漬口不得傾盃覆斗不

得辰出夜入交關伴偶舍後有樹當栽作船上至江

州下到湔案句絕章樵誤連下讀主為府掾求用錢蓋不知船湔錢為韻

推訪聖御覽注云販梭索繇亭買席往來都洛當為

婦女求脂澤販於小市歸都擔棗轉出旁蹉御覽注云

名牽犬販鵝武都買茶御覽注云武楊氏案御覽亦

字今據御覽注云楊往來市聚慎護奸偷入市

不得夷蹲旁卧惡言醜罵多作刁矛持入益州貨易

羊牛案本誤奴自教精慧不得癡愚持斧入山斷輶

裁輶御覽注云若有餘殘當作俎几木屐及彘盤御

注云彘盤御覽注云石薄岸御覽注云石

岸也案據注當作罪切石薄岸竹籠盛石以薄

書案本誤伐牘日暮欲歸當送乾薪兩三束四月當

披九月當穫十月收豆御覽注云十掄麥窖芋御覽

注云

輪麥種御覽注云南南安拾粟採橘安縣出橘持車載輶御覽注云

載輶有利也○案已上正文十四多取蒲葶苑紆音益

作繩索雨墮無所為當編蔣織薄種植桃李梨柿柘

桑三丈一樹八樹此字依藝文類聚為行果類相從縱橫相

當果熟收斂不得吮嘗犬吠當起驚告鄰里棖門柱

戶上樓擊鼓御覽注云漢時官不禁報怨民家皆高樓置鼓其上有急即上樓擊鼓以告邑里

令救取也荷此字依初學記盾曳矛還落三周勤心疾作不得遊

遊奴老力索種莞織席事訖休息當舂一石夜半無

事浣衣當白若有私錢主給賓客奴不得有姦私事

事當關白奴不聽教當笞一百讀券文適訖詞窮詐

索佗佗叩頭兩手自搏目淚下落鼻涕長一尺審如

王大言不如早歸黃土陌丘蚓鑽額早知當爾為

此字依藝文王大夫酤酒真不敢作惡案此文在古

類聚初學記王大夫酤酒真不敢作惡文苑蓋取自古

初學記故大段全同閒有一二小異而已考太平御

覽五百九十八亦載之雖非完篇然可依以訂補者

甚多又載有舊注尤足信據如云蜀土收芋皆窖藏

之至春乃發則知芋今作等之必誤矣馬戶水門也

則知戶今作駟之必誤矣亞白堪也則知亞今作惡

之必誤矣今作駟之必誤矣亞白堪也則知亞今作惡

御覽正文皆未嘗誤也則知輟今作藥之必誤矣今作惡

豈不陋哉其舊注未悉撰人名氏惜御覽載之不盡

乃就取所有兼采藝文類聚初學記亦附鄙見詳加

校定重載於此初學記古文苑皆言此文相傳多誤

茲已扭得通庶垂之方來也

### 難蓋天八事

漢揚雄

一曰日之東行循黃道晝中規牽牛距北極北百一

十度東井距北極南七十度并百八十度周三徑一

二十八宿周天當五百四十度。今三百六十度。何也。  
二曰。春秋分之日。正出在卯。入在酉。而晝漏五十刻。  
即天蓋轉。夜當倍晝。今夜亦五十刻。何也。三曰。日入  
而星見。日出而不見。即斗下見。日六月不見。日六月  
北斗亦當見。六月不見。六月。今夜常見。何也。四曰。以  
蓋圖視天河。起斗而東。入狼弧。閒曲如輪。今視天河。  
直如繩。何也。五曰。周天二十八宿。以蓋圖視天星。見  
者當少。不見者當多。今見與不見等。何出入無冬夏。  
而兩宿十四星常見。不以日長短。故見有多少。何也。  
六曰。天至高也。地至卑也。日託天而旋。可謂至高矣。  
縱人目可奪。水與景不可奪也。今從高山上。以水望



日日出水下影上行何也。七曰視物近則大遠則小。今日與北斗近我而小遠我而大何也。八曰視蓋橈與車輻閒近杠轂即密益遠益疎。今北極為天杠轂二十八宿為天橈輻以星度度天南方次地星閒當數倍今交密何也。文見隋書天文志云以通渾天張薄所輯揚子雲集有其目本載其錄之故

靈憲

漢張衡

昔在先王將步天路用定靈軌尋緒本元先準之於渾體是為正儀立度而皇極有道建也樞運有道稽也乃建乃稽斯經天常聖人無心因茲以生心故靈憲作興曰太素之前幽清元靜寂漠冥默不可為象

厥中惟虛。厥外惟無。如是者永久焉。斯謂溟滓。蓋乃道之根也。道根既建。自無生有。太素始萌。萌而未兆。并氣同色。渾沌不分。故道志之言云。有物渾成。先天地生。其氣體固未可得而形。其遲速固未可得而紀也。如是者又永久焉。斯謂龐鴻。蓋乃道之幹也。道幹既有育物成體。於是元氣剖判。剛柔始分。清濁異位。天成於外。地定於內。天體於陽。故圓以動。地體於陰。故平以靜。動以行施。靜以合化。堙鬱構精。時育庶類。斯謂天元。蓋乃道之實也。在天成象。在地成形。天有九位。地有九域。天有三辰。地有三形。有象可效。有形可度。情性萬殊。旁通感薄。自然相生。莫之能紀。於是

人之精者作聖實始紀綱而經緯之八極之維徑二  
億三萬二千三百里南北則短減千里東西則廣增  
千里自地至天御覽二引有一億一萬六千一百五十里在此下半於八極  
則地之深亦如之通而度之則是渾已將覆其數用  
重差鈎股懸天之景薄地之儀皆移千里而差一寸  
得之過此而往者未之或知也未之或知者宇宙之  
謂也宇之表無極宙之端無窮天有兩儀以儻道中  
其可觀樞星是也謂之北極在南者不著故聖人弗  
之名焉其世之遂句詳未九分而減二陽道左迴故天  
運左行有驗於物則人氣左羸形左繚也天以陽迴  
地以陰溥是故天致其動稟氣舒光地致其靜承施

候明天以順動不失其中則四時順至寒暑不忒致  
生有節故品物用生地以靈靜作合承天清化致養  
四時而後育故品物用成凡至大莫如天至厚莫如  
地地至質者曰地而已未詳至多莫如水水精為漢  
漢周於天而無列焉思次質也未詳地有山嶽以宣  
其氣精種為星星也者體生於地精成於天隋志引  
列居錯跣各有道屬紫宮為皇極之居太微為五帝  
之廷隋志引皇極作明堂之房大角有席天市有坐  
蒼龍連蜷於左白虎猛據於右朱雀奮翼於前靈龜  
圈首於後黃神軒轅於中六擾既畜而狼虬魚鼈罔  
有不具在野象物在朝象官在人象事於是備矣懸

象著明莫大乎日月其徑當天周七百三十六分之

一。地廣二百四十二分之一。案祖暅之所見四作三

劉昭瞿曇日者陽精之宗積而成鳥象鳥而有三趾

悉達不同陽之類其數奇月者陰精之宗積而成獸象兔陰之

類其數偶其後有馮焉者羿請無死之藥於西王母

恒娥竊之以奔月將往枚筮之於有黃有黃占之曰

吉翩翩歸妹獨將西行逢天晦芒母驚母恐後且大

昌恒娥遂託身於月是為蟾蠩夫日譬猶火月譬猶

水火則外光水則含景故月光生於日之所照魄生

於日之所蔽當日則光盈就日則光盡也衆星被耀

因水轉光當日之衝光常不合者蔽於地也是謂闇

虛在星星微月過則食日之薄地暗其明也案舊脫暗字今

依隋書補天繇暗視明明無所屈是以望之若大者作誤

方於中天天地同明繇明瞻明隋志引無此四字案

明還自奪案明舊誤暗今故望之若小者作誤火當夜

而揚光在晝則不明也月之於夜與日同而差微星

則不然強弱之差也眾星列布其以神著有五列焉

是為三十五名一居中央謂之北斗動變挺占隋志引作

動係於占實司王命四布於方為二十八宿日月運行歷

示吉凶五緯經次用告禍福則天心於是見矣中外

之官常明者百有二十四續漢書注有四字隋志可

名者三百二十為星二千五百而海人之占未存焉

案漢志海中星一卷星圖海中占一卷隋志微星之數蓋萬一

千五百二十庶物蠢蠢隋志引咸得繫命不然何以

摠而理諸夫三光同形有似珠玉神守精存麗其職

而宣其明及其衰神歇精斁於是乎有隕星然則奔

星之所墜至地則石文曜麗乎天其動者七日月五

星是也周旋右回天道者貴順也近天則遲遠天則

速行則屈屈則留回留回則逆逆則遲迫於天也行

遲者覲於東覲於東屬陽行速者覲於西覲於西屬

陰日與月共配合也攝提案石氏曰歲星一名熒惑

地候案石氏曰填星一名見晨附於日也太白辰星

見昏附於月也二陰三陽參天兩地故男女取則焉

方星巡鎮必因常度苟或盈縮不逾於次故有列司  
作使曰老子四星周伯王逢芮各一錯乎五緯之間  
其見無期其行無度實妖經星之所然後吉凶宣周  
其祥可盡此文依開元占經更正舛誤

### 失父零丁

漢戴良

敬白諸君行路者敢告重罪自為禍積惡致災天困  
我今月七日失阿爹念此酷毒可痛傷當以重贈用  
相償請為諸君說事狀我父軀體與眾異脊背偃僕  
捲如截脣吻參差不相值此其庶形何能備請復重  
陳其面目鷓頭鵠頸獾狗案此下脫字未詳眼淚鼻涕相追  
逐吻中含納無齒牙食不能嚼左右蹉似西域駱駝



案此句當有請復重陳其形骸為人雖長甚細材面

脫字未詳目芒蒼如死灰眼眶白陷如羹枯此文恐未全存之

案御覽云戴良字文讓而後漢書獨行傳之戴良字叔鸞未知其為一人與否姑附出於此

### 非草書

漢趙壹

余郡士有梁孔達姜孟穎者皆當世之彥哲也然慕張生之草書過於希顏焉孔達寫書以示孟穎皆口誦其文楷其篇無怠倦焉於是後生之徒競慕二賢守令作篇人撰一卷以為祕玩余懼其背彼趨此非所以宏道興世也又想羅趙之所見螢沮故為說草書本末以慰羅趙息梁姜焉竊覽有道張君所與朱使君書稱正氣可以消邪人無其覺妖不自作誠可

謂信道抱真。知命樂天者。若夫褒杜崔。沮羅趙。昕昕  
有自臧之意者。無乃近於矜伎。賤彼貴我哉。夫草書  
之興也。其於近古乎。上非天象所垂。下非河洛所吐。  
中非聖人所造。蓋秦之末。刑峻網密。官書煩冗。戰攻  
並作。軍書交馳。羽檄分飛。故爲隸草。趣急速耳。示簡  
易之旨。非聖人之業也。但貴刪難省。煩損復爲單。務  
取易爲易知。非常儀也。故其讚曰。臨事從宜。而今之  
學草者。不思其簡易之旨。以爲杜崔之法。龜蛇所見  
也。其摠扶桔。詰屈。天乙。○案二音舊。今改。不可失也。齟齬  
以上。苟任涉學。皆廢倉頡史籀。競以杜崔爲楷。私書  
相與。猶謂就書。適迫遽。故不及草。草本易而速。今反

以難而遲。失指多矣。凡人各殊氣血。異筋骨。心有疎  
 密。手有巧拙。書之好醜。在心與手。可強為哉。若人顏  
 有美惡。豈可學有相若耶。昔西施病心。捧鬢而顰。眾  
 愚效之。祇增其醜。趙女善舞。行步媚盡。學者弗獲。失  
 節匍匐。夫杜崔張子。皆有超俗絕世之才。博學餘暇。  
 遊手於斯。後世慕焉。專用為務。鑽堅仰高。忘其罷勞。  
 夕惕不息。仄不暇食。十日一筆。月數丸墨。領袖如皂。  
 唇齒常黑。雖處眾坐。不遑談戲。展指畫地。以草劇壁。  
 臂穿皮刮。指爪摧折。見鯁蘇來切。案舊脫出血。猶  
 不休輟。然其為字。無益於工拙。亦如効顰者之增醜。  
 學步者之案此六字墨池編脫依補失節也。且草書

平御覽七百四十九引補

之人。蓋伎藝之細耳。鄉邑不以此較能。朝廷不以此科吏。博士不以此講試。四科不以此求備。徵聘不問此意。考績不課此字。徒善字既不達於政。而拙草亦無損於治。推斯之所言。豈不細哉。夫務內者必闕外。志小者必忽大。俯而捫蝨。不暇見天地。天地至大而不見者。方銳精於蟻蝨。乃不暇焉。第以此篇研思。銳精。豈若用之彼聖經。稽歷協律。推步斯程。探賾鉤深。幽贊神明。覽天地之心。推聖人之情。折議論之中。理俗儒之諍。依正道於雅說。濟雅樂於鄭聲。興至德之和睦。(宏)大倫之(元)清。窮可以守身。遺名。達可以尊主。致平。以茲命世。永監後生。不亦淵乎。

譏許由

魏麋 元

潛居默靜。隱於箕山。身在布衣。而輕天下。世人歸其  
高行。學者以爲美談。夫際會之間。矯時取譽。至乃抽  
簪散髮。背時逆命。隱於山林之中。以此自高。非以勸  
智能之士。入通達之教。故譏而責之曰。

太上貴德。其次立功。世殊時異。不得而同。故伯禹過  
門而不入。稷契刻節。而奮庸。股肱帝室。作民王公。今  
子生聖明之世。得觀雍熙之治。則當據不朽之功。暢  
不羈之志。龍飛鳳起。修攝君司。佐天理物。幹成王事。  
若子以堯爲闇主。則歷代載其功。以民爲貪亂。則比  
屋可封。若夫世濁時昏。上無賢君。忠臣不出。小人聚

羣即當撥煩理亂跨騰風雲光顯時主拔濟生民何  
得偃蹇藏影蔽身夫道不虛行士不徒生生則幹時  
爲國之楨故伊尹干湯周公相成興治濟世以致太  
平生有顯功沒有美名人生於世貴能立功何得逃  
位矯世絕蹤丹朱不肖朝有四凶堯放求賢遜位於  
子度才處分不能則已何所感激臨河洗耳山居巢  
處執心不情辭君之祿忘君之榮居君之地避君之  
庭立身若此非子之貞欲言子智則不仕聖君欲言  
子高則鳥獸同羣無功可紀無事可論

買冢地蒔

晉楊紹

大男楊紹從土公買冢地一丘東極闕澤西極黃滕

南極山背。北極於湖。直錢四百萬。即日交畢。日月爲證。四時爲任。太康五年九月廿九日。對共破。剗民有私約如律令。

奴券

晉石崇

余元康之際。出在滎陽東住。聞主人公言聲大粗。須臾出趣吾車曰。公府怪吾家嘵嘵邪。中買得一惡羝奴。名宜勤。身長九尺餘。力舉五千斤。挽五石力弓。百步射錢孔。言讀書。欲使便病。日食三斗米。不能奈何。吾問公賣不。公喜。便下絹百疋。聞謂吾曰。吾胡王子。性讀書。公府事。一不上券。則不爲。公府作券文曰。取東海巨鹽。東齊羝羊。朝歌蒲薦。八板桃牀。負之安邑。

梨栗之鄉常山細縑趙國之編許昌之總沙房之繇  
作車當取高平莢榆之轂無尾鬪體之狀大良白槐  
之輻河東茱萸之輞亂節桑轆中脫太山桑光長安  
■中脫雙入白屋未脫釘鑠巧手出於上方見好  
弓材可斫千張山陰青槻烏皞柘桑張金好墨過市  
數蠶并市豪筆備郎寫書皞角幘道未脫金案玉椀  
宜勤供筆更作多辭乃斂吾絹■未脫而歸此文不全

外他書罕載故錄之

斷酒戒

晉庾 闡

蓋神明智惠人之所以靈也好惡情欲人之所以生  
也明智運於常厓好惡安於自然吾固以窮智之害



性任欲之喪真也。於是椎金壘，碎玉椀，破兕觥，捐觚瓚，遺舉白，廢引滿，使巷無行槥，家無停壺，剖樽折杓，沈炭銷鑪，屏神州之竹葉，絕縹醪乎華都。言未及盡，有一醉夫，勃然作色曰：蓋空桑珍味，始於無情，靈和陶醞，竒液特生，聖賢所美，百代同營。故醴泉涌於上，世懸象渙乎列星，斷蛇者以興霸，折獄者以流聲。是以達人暢而不壅，抑其小節而濟大通。子獨區區，檢情自封，無或口閉其味，而心馳其聰者乎。庾生曰：爾不聞先哲之言乎。人生而靜，天之性也。感物而動，性之欲也。物之感人，無窮而情之好惡，無節。故不見可欲，使心不亂。是以惡迹止步，滅影即陰，形情絕於所

託萬感無累乎心。心靜則樂非外唱。樂足則欲無所  
淫。唯味作戒。其道彌深。賓曰唯唯。敬承德音。

弔鶴文

晉湛方生

余以<sup>(元)</sup>冬修夜。忽聞階前有孤鶴鳴。遡寒風而清叫。  
感淒氣而增悲。屬聽未終。余有感焉。乃爲文以弔之。  
惟海嶠之竒鳥。資秀氣以誕生。疑鸞皇而比翼。超羽  
族而長靈。濯冰霜之素質。颺九臯之竒聲。啄荒庭之  
遺粒。漱絕澗之餘清。望雲舒而息翮。仰朝霞而晨征。  
輟王子之靈轡。繫虞人之長纓。辭丹穴之神友。與雞  
鷲而同庭。軒天衢而奔想。顧樊籠而心驚。獨中宵而  
增思。負青霜而夜鳴。資沖天之雋翮。曾不殊於鳥雀。

稟樞壽之修期。忽同彫於秋薄。匪物之足悲。傷有理而橫落。

筆陣圖

晉衛夫人

若初學書。先須大書。不得從小。善鑒者不寫。善寫者不鑒。多骨微肉者。筋書。多肉微骨者。墨猪。多力豐筋者。聖。無力無筋者。病。一二從其消息而用之。

鮒表

梁韋琳

臣鮒言。伏見除書。以臣為粽。參一曰熬將軍。油蒸校尉。臞州刺史。脯腊如故。肅承將命。含灰屏息。憑籠臨鼎。載兢載惕。臣美愧夏鱸。味慚冬鯉。常懷鮐服之誚。每懼鼈巖之譏。是以漱流湖底。枕石泥中。不意高賞殊

私曲蒙鈞拔遂得超升綺席忝預玉盤遠廁玳筵猥  
頽象箸澤覃紫脯恩加黃腹方當鳴姜動椒紆蘇佩  
櫛輕瓢纒動則樞盤如烟濃汁暫停則蘭肴成列宛  
轉綠壘之中逍遙朱唇之內銜恩噬澤九殞弗辭不  
任屏營之誠謹列銅鎗門奉表以聞

詔荅曰省表具知卿池沼縉紳陂渠俊乂穿蒲入荇  
肥滑有聞允堪茲選無勞謝也

賜錢武肅王鐵券

唐昭宗

維乾寧四年歲次丁巳八月甲辰朔四日丁未皇帝  
若曰咨爾鎮海鎮東等軍節度浙江東西等道觀察  
處置營田招討等使兼兩浙鹽鐵制置發運等使開

府儀同三司檢校太尉兼中書令使持節潤

輟耕錄作圃非

郟越等州諸軍事兼潤越等州刺史上柱國彭城郡

王食邑五千戶食實封一百戶錢鏐朕聞銘鄧隲之

勲言垂漢典載孔悝之德事美魯經則知褒德策勲

古今一致頃者董昌僭偽爲昏鏡水狂謀惡貫深染

齊人而爾披攘兇渠盪定江表忠以衛社稷惠以福

生靈其機也氛祲清其化也疲羸泰拯於粵於塗炭

之上師無私焉保餘杭成金湯之固政有經矣志獎

王室績冠侯藩溢于旂常流在丹素雖鍾繇刊五熟

之釜竇憲勒燕然之山未足顧輟耕錄作圃非功抑有異數

是用錫其金版申以誓詞長河有似帶之期泰華有

如拳之日。惟我念功之旨。永將延祚子孫。使卿長襲  
寵榮。克保富貴。卿恕九死。子孫三死。或犯常刑。有司  
不得加責。承我信誓。往唯欽哉。宜付史館。頒示天下。  
中書侍郎兼戶部尚書平章事臣崔允宣奉。

續古文苑卷第二十

金陵劉文奎弟文楷  
模鑄

